

卷之三



華陽集卷第二十六

金壇後學于孔燕校

啓

大信賀朱中書啓

伏審光膺中詔峻陟西臺以端方直亮之偉人當佐  
佑詢謀之大任士夫相慶遠近所同竊以朝廷之官  
莫尊於二府政事所本獨繫之中書禮固重於前聞  
任莫難以今日邦基再造王業中興邊陲之兵革未  
寧州郡之盜賊多有六飛在御靡遑奠枕之安二聖  
蒙塵方佇迎鑾之策法度尚須於訂議人材尤急於



搜揚息四民愁歎之聲還萬里農桑之業惟茲數十  
難能之事悉委二三同德之臣非有真賢曷當盛舉  
恭惟某官建標天地逸足風雲眇萬物以遐觀曠千  
齡而獨步粵從早歲固已優夔契之才雖在平時常  
不廢廊廟之語遭國家之多難作屏翰以宣勞嘗險  
阻於兵戎出沒之中罄忠嘉於上下危疑之際身任  
大計心懷隱憂時方急於播告之修職遂當乎詞章  
之選思如泉涌吏胥以腕腕爲辭今若風行父老至  
扶杖往聽此特其筆墨之遊戲益本於議論之淵源  
擢自北門進登左轄眷中樞之虛位疇僉言於外朝

不藉多人思見元超之治無易卿者果歸廷碩之賢  
夫位盛者憂必深而望隆者功亦大旣參華於宰路  
實同秉於國鈞撥亂興衰頗類斷鼈而立極修廢舉  
墜必將解琴而更張庶觀君子之所爲當與天下而  
同慶某賦性庸陋與世闊疎忝竊一官推移半世申  
屠幸而無過益由久處於賢人鮑叔知其有親遂復  
叨官於鄉部正間居而待次忽虛宁之登賢情發於  
中喜深不寐念此洪鈞之託益知孤迹之安元禮龍  
門固莫陪於賀客公曾鳳沼願長借於恩波

賀白太宰啓



其官先朝元老後學宗師忠嘉夙簡於上心密勿久  
陪於國論廟堂倚以爲重縉紳賴之而安三星耀天  
極之旁自然拱北九鼎藏神策之妙正合調元非天  
私于有邦惟帝賚茲良弼職當補袞旣高山甫之賢  
門不受私况得申屠之譽欽承渙號允協師言夫移  
風非俗吏所能而正臣乃治世之表必將道揚洪烈  
弼亮中樞豈惟專八柄以詔王是乃兼三公而論道  
夫曹參非不治事蓋安下民者清靜爲先如房喬專  
任進賢則執大政者細微可略兼濟二美獨高一時  
他人所難惟公是賴

首尾

### 賀黃相啓

伏審光膺制綽峻陟台纏一代偉人允協股肱之望  
八荒壽域悉歸陶冶之公歡聲所加和氣可召竊以  
春秋尊上公而謂之宰人主論宰相而付之權一日  
萬幾經大猷於有截三天兩地幹洪造以無私雖曰  
衆賢聚於本朝必也上帝賚之良弼始協雲龍之會  
可圖竹帛之勲果得真儒克勝大任恭惟某官逢時  
多難許國一心早奉王靈逖分帥閫謀謨制勝臨尊  
俎以折衝社稷貼危督干戈而周衛高密觸紛以赴  
光武房喬杖策而謁太宗感會有初忠嘉彌著離亨





原件短缺

P4



作於明兩扶日轂以升暘晉錫蕃於晝三冠天樞而  
入輔獨當宥密深贊經綸載疇柱石之英亟委鈞衡  
之寄國勢增重乎九鼎民瞻益峻乎三階夫位盛者  
憂必深而望隆者功亦大考申甫以烝民崧高之什  
事特著於蕃宣稽丙魏以元康地節之功時靡聞於  
變故記在舊史尚稱名臣今乃遭古人之所未嘗任  
朝廷之所最重凡是規恢之略得於談笑之間蓋將  
洗萬古而空之豈特專一時之盛者某銜袖雖漫於襮  
刺曳裾阻造於膺門聞盛舉之軒昂激懦衷而奮勵

賀呂相啓

遽頒遂乘輶而問俗盡循三尺兼舉六條爰多蹇之  
微蹤獲叨榮於聯事瓜期未報匏繫何言辱竿牘以  
先時深慚過禮候門墻於他日尚許依仁

賀劉相年啓

歲元啓祚建夏正以求端邦憲始和謹周官而垂治  
恭惟某官安危注意文武兼資列上相於東垣顯面  
太微之位撫成師於南服獨登大將之壇號令風行  
酋渠電掃壯萬里長城之勢寬九重旰食之憂茂對  
休辰倍膺殊祉牙旗日暖知細柳之春回黼座天臨  
佇公槐之晝接庶諧啓沃用福寰區某待次鄉閭坐



忘歲律竊依仁於封部願屬禮於韃橐賀燕爭趨適  
阻負薪之疾登龍莫遂徒傾恭粹之心頌詠所歸敷  
宣曷旣

代姪合謝解啓

一郡應書孰非勅敵十條問義獨冠羣儒雖不足致  
之意中亦自喜出于望外竊以六經之要百世所傳  
粹然道德之微盡在是矣講若帝王之制孰能違之  
故自虞夏商周以來莫非詩書禮樂之教習聞其號  
豈獨見於修身被飾厥文蓋將用以取士奈何執以  
一說使之拘於小文黨同門而妬道真是末師而非

往古大道旣破更令益繁乃不能漸進民心復何以  
激昂士氣每發德音下明詔固以爲將新復古之科  
而進真賢舉實廉乃反不能明當世之務此漢唐所  
同患者非睿知莫能革之幸真主之篤生喜斯文之  
復振四海咸仰萬化更新方一德以同風學弛專門  
之禁俄兩忘而化道人無異戶之趨師心自得於淵  
源揮翰曷嫌於忌諱文風蕩蕩士論洋洋乃復見三  
代之英是謂極一時之盛宜取國士以最能書如某  
者智乏周身才不逮衆粗學古人之事靡諳世俗之  
心韓子文工送五窮而不去相如志在空四壁以徒



慙雖見笑於新學晚生固未嘗不潛心大業然膏油以繼晷有類書癡因筆墨以成文頗或技癢頃自成童之歲固已挾策而遊較數子有一日之長欲百戰取萬全之勝鄉評與善泮水呈能曾叨一鶚之薦書遂冠六齋而稱首觀光上國方欣從下土而來合戰春闈不謂見大敵則怯旣折北而不救敢圖南而再飛屬茲更化之初兢奮仰高之志毛錐鐵硯念頑姿尚足以磨新白葦黃茅故荒學益加於鉏舊適侯邦之詔下偕鄉士以朋來筆陳爭先文鋒競逐遣趙使而少一初笑遂以備員舉漢士之無雙不圖錯乃充

賦出乎其類得之若驚雖藻鑑之無私亦品題之過分青氈舊物去七年而復還綠綺新聲鼓再行而愈麗念言么麼誰使遭逢此蓋伏遇某官性稟嶽靈才高人傑華國富文章之譽立朝聞議論之公左史記言合春秋之大法西清賜對敷蹇諤之深忠偶厭直於承明暫出分於方面吏畏神明之政民歌愷悌之風大度包荒念不遺於一物至誠推轂尤樂取於羣材致此謬庸亦蒙甄錄某敢不勉葺舊學益勵前修化蟲臂之微幸已成形於造物擢羊角而上誓將奮翼於天池庶獲微勞仰酬大惠



代姪合上葉左丞啓

藩宣重寄有嚴制閫之雄草芥微官獲造曳裾之列  
念五窮之見困叨一眄以增榮仰佩謙光伏深愧汗  
竊惟自古寒士之或顛躓必擇當世巨公以爲依歸  
非獨慕於風聲殆將希其題拂羸糧裹飯願見者忘  
重趼之勞擁帚掃門託迹者有終身之幸望光塵於  
坐客之末承咳唾於立談之間升濟堙沉奮發枯朽  
是以一識韓荊州之面封侯至或可輕粗知蕭穎士  
之文僕廝戀而不去必將收拾四方奔走之士宜有  
超絕一時卓偉之才而况道德高於古人勲名冠於

當代激昂恩義慰薦孤平儻有哭於途窮可無望於  
川納恭惟某官累朝舊德間世英姿温温秉君子之  
文挺挺有大臣之節詞章灑噩陋班馬以稱工廊廟  
經綸贊臯夔而並駕功存社稷名在鼎彝東山方逸  
於謝安南土已思於申伯繡裳虛宁將疏三接之恩  
齊鉞選賢先拜十連之寵威行外鎮令肅中權寬九  
重宵旰之憂協千載風雲之會輕裘緩帶投壺雅歌  
泛水依蓮遴集幕中之彥披雲捲霧共談堂上之奇  
曾謂謏聞敢期殊遇方懼旅進而旅退遽蒙三浴而  
三薰惟大賢無所不容與其絜也故君子信於知己



輒盡布之伏念某家貧無以代耕歲晚乃知向學然膏油而繼晷羞篆刻以成文謬忝一官虛甑待瓜時之及坐間三載束裝赴桐汭之期不圖豪奪以成風遂致孤蹤之失路望窮閭而卻走追故步以懷慚越人彎弓談笑者衆孺子入井怵惕爲誰與其抱隻影以興哀孰若仰宗工而自訴竭來彌月老去驚春幸造膺門猥竊登龍之譽載懷襴刺尚希薦鶚之書退念餘生亦云易與苟得効一職而受侏儒之俸便能食衆指而安鷦鷯之枝桃李成陰諒春工之可待糝糠猶鑄納鈞造以何難誓捐未死之軀庶荅不貲之

惠

代舅李治表上宰相啓

掃門願見幸承咳唾之餘拜命言旋恩出陶鎔之末初官過望舉族增輝念倏遠於台堦恍已更於歲籥王春布令道迎和氣之回賢業熙天允集神休之盛恭惟某官夙韜遠略起佐中興道格皇天功高邃古金聲玉振師孔孟以遭時武緯文經輔堯湯而致治自再登於宰路乃獨秉於元鈞事有至難非衆人之敢決謀皆素定仗大信以必行收兵柄以彊主威息羣言而定國是遠馳使節大浹鄰歡豈徒盡人之事



華陽集 卷之三十六 九  
而人有革心殆將合天之意而天亦悔禍固陵肇卜  
果獲奉於龍輜長樂久虛迄迎還於駟馭上以寬宥  
肝劬勞之念下以慰黔黎慕望之私盛德所傳曠古  
未有某逢時不競晚學何知依仁桑梓之鄉忝迹門  
闈之舊惟大雅未忘於遺履故危蹤竊効於彈冠燕  
領何人敢有封侯之志鼠肝微物徒勤造物之私自  
視空踈無所論報永言瞻詠但極精微

又代賀冬啓

推天地四時之氣胚胎已肇於黃鍾布神民萬物之  
和燮理實資於公鼎恭惟某官道傳孔孟德並臯夔

坐幹鴻樞丕闡彌文之化中興寶祚獨高蓋世之勲  
四民阜康五物來備日官居卿以底日順剛長於時  
亨天子郊祀以配大贊乾行於熙事神人交相視履  
多祥隆國棟以益尊固邦基而同永某官叨寵借迹  
困孤微萃五福以朋來但想槐庭之慶列羣英而燕  
賀莫陪袞席之趨

江東提刑到任謝宰相啓

茆然衰病之餘何心祿仕付以澄清之任有醜面顏  
矧一路之所臨合十州而共治民力已凋於近歲吏  
姦多忽於下情盜竊起而縱橫兵戈隨以紛擾誰非



聽訟蔑聞行露之歌責在有司宜名御觀風之舉有如頑鈍曷稱選掄得官十有九年遇事百無一可索長安之米嘗獲誚於郎潛昧城旦之書顧奚堪於使指徒以親庭之欲便遂叨鄉部之初除有同擇地而安實出自天之幸瓜期屢及匏繫彌深每將攬轡以之官輒復杜門而待次閱歲陽之七換更宸綍之四頒舊物故存政恐妨於近制新恩甚渥俄就易於隣封夫以山野陋庸之姿上煩朝廷委曲之記使其自處未必能然冒寵則優撫躬曷措茲蓋伏遇某官躬秉道德端居廟堂扶社稷之中興頗類斷鼇而立極正

紀綱之欲壞尤先推轂於羣材致此賤微亦蒙甄錄

上呂都督啓改云某官入冠揆路出總戎旃天下有達尊三異數兼榮於將相中國之長技五神兵坐鎮於蠻夷大開公正之途不棄草茅之賤致茲念乘軺屏瑣亦預使令某敢不恪奉教條講修職業之非據深懷顛覆之憂仰大厦之可依實賴併懽之賜其如率職不敢愛身

上葉左丞啓

矜庶戮之不辜誤玷輶車之寵長萬夫而觀政竊依帥閫之嚴自視庸虛可量欣幸恭惟某官華夷重望廟社元勳文高三代之英德冠累朝之舊入參大政訂謨恪奉於中宸出殿雄藩宵旰靡勞於北顧民瞻







與陳運使啓

衰病餘生顧何堪於祿仕澄清重寄竊自懼於顛隳  
恭惟某官問學得之淵源才猷敏於經濟欲試幾微  
之務暫淹飛輓之勞底御邦財已見錢流於地上趣  
歸禁路佇觀詔下於日邊曾是陳人獲聯治部鼠牙  
決訟深慚行露之歌鵬翼搏扶願假垂天之蔭

回趙提點啓

臥疾鄉間莫遂挂冠之請按行獄市徒增攬轡之羞  
尚幸庸虛仰依明哲恭惟某官受天間氣爲國老成  
蘭省潛郎藹聲華於士論蓬山仙伯獨領袖於英游

惟其多開物成務之材故欲展富國彊兵之術鍾官  
咸奮寶藏滋興佇聞駟詔之頒歸踐鴛行之寵豈伊  
朽質獲近餘光登元禮之門念進趨之匪遠倒陳遵  
之牘辱裒借以彌勤適方在行不卽裁報

回宣州張守啓

衰病餘生杜門已久澄清重寄攬轡奚堪欲稍緩於  
曠穰幸密依於明哲伏惟某官學窺聖域名右漢廷  
直指遺風吏識乘輅之舊剖符新政人推臥閣之賢  
遠圖暫屈於州麾異寵卽歸於禁路顧茲頑鈍夙仰  
聲猷邈爾治封未講郵書之好藹然謙德先貽袞字



之褒欽佩過情重慚不敏

回建昌朱守啓

登孟博之車量材曷稱倒陳遵之牘荷意惟勤適將命以在行愧占詞之弗謹某官風雲逸足霄壑垂光龍馬負圖聯內閣邃嚴之直鹿車方道廣侯邦惠養之仁念久去於蓬山宜卽歸於禁路豈伊晚節獲覘餘光疇昔論交尚紀緒言之益撫謙下逮猥先翰墨之頒足未及於踵門心已傾於望履

與池州葉守啓

伏審光奉明綸寵臨巨屏妙簡西清之列暫分北顧

之憂下車云初闔境相慶恭惟某官道貫三代學通九流屢更藩翰之勤綽有神明之政矧池陽之名郡當江左之上游兵火仍灾痛創殘之未補閭閻復業仰慈惠之方深行聞臥閣之功遂促追鋒之召某稟生甚拙慕德惟深將命在途漸喜封圻之近造門有日卽諧雲霧之披

回太平許守啓

伏審光膺宸綍懋建州麾仰師帥之得賢措兵民於無事歡呼所至遠邇惟均伏惟某官忠嘉夙簡於上心才術更優於時論藩垣借重拯黔黎於塗炭之餘



樽俎折衝驅盜賊於笑談之末雖下車之日未久而  
閉閣之風已高將促召於鋒車遂進儀於禁路顧茲  
庸陋竊服聲猷銜命于行尚阻膺門之謁鳴謙下逮  
猥先蕭牘之頒拜賜則優感銘曷旣

與饒州李守啓

負薪嬰疾將待盡於餘年攬轡之官遽叨榮於一路  
自視衰遲之迹尚依明哲之光恭惟某官抱王佐之  
偉材明國家之大體進儀禁路專史臣言動之書出  
偃侯藩著循吏撫綏之政閱時未久雅望益隆豈容  
臥閣之堅行趣追鋒之召敢圖晚節獲並英游奉指  
不才莫決鼠牙之訟危蹤有託徒欣驥尾之榮

回董提刑啓

鄉閭待次聊欲奉雙親之歡獄市平反何以當一路  
之寄未卜交符之日已深攬轡之羞正賴故人曲垂  
大芘伏惟某官天麟表瑞廟璉稱珍蔚高國士之風  
早勵古人之志螭蚬直筆已推狐史之家聲芸閣紉  
書更仰蓬山之舊業稍淹大用良鬱師言佇促鋒車  
復還禁路自顧衰遲之迹夙叨朋舊之私邈未造於  
高閣猥辱先於華問瑰詞借譽敢忘置袖之三年良  
晤有期尚幸解顏而一笑



華陽集 卷之三十一  
賀權樞密啓

伏審光奉明綸進登右府允協股肱之望獨當宥宥  
之司無間邇遐同增抃喜竊以國體所繫兵柄爲先  
峻極西庭上應斗樞之象賁襄密命入籌帷幄之嚴  
事有關於中書尊實等於丞相欲廟堂之增重顧選  
授之尤難方將委任而責成並注安危之意有能奮  
庸而熙載宜兼文武之資恭惟某官受天傑材爲國  
重器學海造域中之大孔孟同歸談鋒多堂上之竒  
孫吳暗合早飛騰於華近屢罄竭於忠嘉矧當四方  
負固之時尤賴千里折衝之策果膺殊渥遂贊本兵

玉帳經綸旣奠安於宗社槐庭密勿卽正位於公台  
仰觀君子之所爲期與天下而同慶某稟生疎拙夙  
荷眷知聞新命之初傳覺歡悰之倍集心同燕雀徒  
忻廣廈之成身繫匏瓜莫遂趨庭之謁其如頌詠曷  
究敷陳

賀參政啓

伏審光奉明綸入參大政事關廟社喜格天人竊以  
治道所先擇賢爲大置諸廊廟必求名德之全若時  
謀謨用協股肱之望矧國家之多難方宵旰以深憂  
將期解甲而息肩尤在折衝而制勝故隨會見用晉



國之盜逃犇而汲黯在朝淮南之謀寢息公議旣與  
羣陰自消爰有哲人克膺明命恭惟某官金聲玉振  
武緯文經議論醇乎古人備四時之正氣典章出其  
大手炳三代以同風起自祠庭復還視草坐席未溫  
於東閣機衡遂贊於中台衆賢聚於本朝已覺巖瞻  
之峻上帝賚之良弼行外鼎鉉之尊某晚學何知承  
顏最舊念去桃陰之久幸依汾里之仁新命初傳懽  
悰倍集按行獄市方親駢突之鞮瞻望鈞墀坐阻鳧  
趨之謁其如欣訟曷究叙言

賀內翰啓

伏睿光奉明綸還直北門之峻親承密旨獨居東閣  
之尊驚詔令之一新仰恩榮之加舊歡呼相慶中外  
所同竊以翰墨文章擅詞林之寵詢謨獻納專內相  
之權是爲儒選之極高殆非他才之可雜玉堂晝靜  
鈴索夜呼備黼座之天臨紛書詔之雲委任官能否  
係國重輕實惟選授之難况在艱虞之日憂邊思職  
將推頗牧於禁中求舊得人豈歎嚴徐之見晚恭惟  
某官曠世之高才獨步立朝之大節可觀以忠信結  
於深知彼功名視爲餘事仰斯文之未墜賴故老之  
重來蓮燭夜歸墨麻曉出山東悍卒行聞感泣之思



華陽集 卷之二十七  
坐 upper 同寮佇興禮絕之拜某稟生疎拙夙荷眷知聳  
新命之初傳覺歡悰之倍集

賀建康李端明啓

伏審外華秘殿出鎮雄藩十國爲連兼總兵民之寄  
萬夫觀政坐銷愁歎之聲無間邇遐同極抃喜恭惟  
某官大事能斷遠圖是經秉直節而不回肅威名之  
久著立朝抗論姦謀旣息於淮南分閫授師茂略更  
煩於江左隱若長城之勢居然莫枕之安豈徒臥護  
於一方蓋將信威於萬里顧茲庸陋叨荷眷知獄市  
按行未卜交符之日台墀趨進預欣望履之榮儻宿

惠之未忘尚孤蹤之有託

朱相遠迎啓

伏審光奉明綸寵還真館促赴鋒車之召有嚴袞路  
之趨久屬望於蒼生佇儀圖於舊德入當國論宜大  
臣無憚於暑行妙簡淵衷諒宣室已傾於前席觸炎  
威之方熾涉砥道以惟勤聳聞旌馭之來首獲望塵  
之拜其爲欣幸罔罄敷陳

上呂都督啓

伏審杖鉞臨戎益峻三台之望前茅啓道有嚴十乘  
之行肅萬旅以營屯擁百神而訶護江山改觀廟社



華陽集 卷之二十七  
受寧恭惟某官忠憤格於天淵勲名震乎夷虜任茲  
國事獨以身先鶉火方中觸炎曦而罔避招搖在上  
考視履之多祥某志在執鞭職當負弩屬採薪而獲  
疹趨半道以馳還尚賒約束之嚴竊動震惶之色仰  
惟鈞造俯賜鑒憐

與韓舍人啓

阻奉英標念久更於歲籥邊聞吏隱方就逸於祠庭  
仰高靜退之風重積瞻馳之素恭惟某官才雄當代  
名配古人進登侍從之華獨藹詞章之譽承明厭直  
閔勞旣遂於高情宣室召還圖任將歸於大用顧茲  
頑鈍夙荷眷知論五經於石渠尚記緒言之益按九  
章於獄市敢忘厚德之依適整駕以在行喜望塵之  
不遠儻未絕曳裾之禮期遂造於門墻猶或崇伐木  
之仁願復承於謦欬歡悰所激占叙奚殫

與姚都運啓

竦服聲猷志極高山之仰叨承芘映寵增末路之光  
馳驅尚阻於登龍寤寐敢忘於附驥恭惟某官名高  
月旦識洞陽秋問學深游夏之科才術妙管蕭之亞  
有嚴戎閩聯上相之賓寮獨任計臺萃六師而飛輓  
威行八路風動一時民不告勞士有宿飽策殊勲於



異日孰先經畫之勤拜新渥以還朝佇副弼諧之望  
時當流火涼生稗金聞旌旆之少休諒神人之咸喜  
起居甚適福履具宜不勝拳拳門墻之私聊貢區區  
竿牘之問

與傅參謀啓

走塵路之七旬敢有懷安之志望牙旗於千里浸稽  
伏謁之儀非自置於闕踈諒必蒙於簡照恭惟某官  
才雄當代名配古人富五經之紛綸爲四海之模楷  
奮志英特濟時艱危尊相臣以兼將臣首冠賓僚之  
選使仁者以佐賢者獨高籌策之良沉深方費於中

權叅決遂專於帥閫威行八路風動一時坐分北顧  
之憂遠却南侵之侮戮鯨鯢以築京觀期國難之將  
平作舟楫而濟巨川竚祖風之復振顧茲么麼雅辱  
眷知一去門墻七更歲籥心傾三益敢論杵臼之交  
職在九章正賴帡幪之庇卽奉承於約束已切戒於  
馳驅

與劉參議啓

迤遠聲猷每極高山之仰頰更寇亂靡遑尺牘之修  
退念闕踈伏增震懼恭惟某官瑞麟一角祥鳳九苞  
學窮游夏之淵源文列傅班之伯仲姓字早標於千



佛名敢直言忠嘉屢罄於七人事無遺策志欲康於  
天步時方迫於戎昭泛淥水而依紅蓮沉靜已煩於  
遠略涉赤墀而登紫禁便蕃行服於邇聯惟是謬庸  
夙承眄睐幸因賤事當稟令於轅門已涉修途卽通  
名於賓謁

與韓太尉啓

伏審南服宣威破梟羣而雷掃北轅奏凱肅虎士以  
雲屯諒先十乘之行自致百神之護恭惟某官智深  
韜略神授機符當國步之多艱奮戎昭而特起漢壇  
獨拜家聲旣嗣於淮陰衛幕遐征師律益嚴於灞上  
肆平巨猾果奏膚功亟振旅以還軍佇策勲而進律  
某平反獄市景仰轅門竦行旆之匪遙顧趨風之敢  
後卽期瞻望預極忻愉

賀孟參政啓

伏審光奉制書廣臨督府機衡舊德載聯上衮之華  
貔虎新軍更肅中權之令歡欣畏愛遠邇均齊恭惟  
某官温温秉君子之文挺挺有大臣之節深憂國計  
自結主知廊廟登賢蚤入陪於大政甌閩謀帥亟掃  
蕩於兗渠顧茲八路之權尤屬九重之慮欲成丕烈  
宜付偉人畀冊命以加榮更節旄而增重居然莫枕



隱若長城恢漢祚於中原佇復孔明之策扶唐室而再造徐觀尚父之功某身在洪鈞職當部屬望光塵之入境夙堅負弩之誠受約束以趨風將遂執鞭之志

與詔使啓

伏審光膺宸詔榮奉使華問俗觀風按六條而黜陟登車攬轡聳百郡之觀瞻恭惟某官天賦遠猷世獲重語公才公望早膺負辰之知允武允文遂贊樞庭之議肆求直指果副僉諧導德意於閭閻兵火之餘達幽枉於宵旰焦勞之際威行漢節仍兼御史之權

名配周官大振揮人之職矧寒帷特專於所任而授指固異於常時暴勝之高逐捕之名徒繡衣之有耀范孟博抗澄清之志曾給札之無聞孰若當仁斯爲盛舉某衰遲末路景仰英標叨承犴獄之司平反何有忽報輜軒之動投効靡遑儻使青天獲雲霧之披尚覲厦屋有旃幪之賜







有復古之美冠鄧佐漢光武致中興之功要在任得其人不然何以能國恭惟某官建標天地論篤古今盛德粹溫氣備四時之正雄文雅健風同三代之醇早依日月之光亟濟雲龍之會遭時不競秉國之鈞翊萬乘於兵戎出沒之中屹長城而外距撫羣情於兇孽創攘之際遡大川而獨航遂正君臣再安社稷方閔勞於機務旋屬望於蒼生趣赴鋒車還服袞職上既悔用於新進偉舊德之登庸人皆喜見於老成跂同心而輔政儀圖大計恢復中原佇觀賢者之所爲將與天下而同慶某賦性甚陋辱知最深逖聞新

命之傳倍激歡悰之切

賀信州連顯謨啓

伏審光奉除書遠臨巨屏一麾出守暫分宵旰之憂千里承風已服神明之政恭惟某官才不世出道與時行養之有源學問窮於壺奧發而中節功業蓋其緒餘粵從清切之班屢屈藩宣之寄遇盤根而必解恢游刃而有餘矧茲上饒實古名郡徒得君重載煩臥閣之能旣結主知卽赴追鋒之召如某謏陋夙荷眷存回想石渠恍英游之若夢聳瞻熊軾覺良晤之有期懽抃之懷叙言曷究



回宣州沈待制啓

上同前  
 至之寄矧宣城之故郡多謝公之遺民獄訟不繁笑  
 談可辦雙谿疊嶂想未厭於登臨一札十行諒即膺  
 於圖任如其謫陋夙荷眷存發策宸庭既識鷓鴣之  
 化觀風獄市更聞襦袴之謠念良覲之尚賒辱華牋  
 之先及謙冲則至愧佩何言

與交代張提刑啓

伏審寵拜宸恩榮持使節將有光於前政用深慶於  
 得人恭惟某官問學得之淵源才猷稟乎精粹論篤  
 古人之事力行憂國之言含香握蘭謂卽外於華近

登車攬轡猶暫屈於澄清簡自淵衷惠茲江左兼六  
 條而並舉聳一路之遐觀滯訟將平反而出之巨姦  
 有投効而去者眷言辱陋夙仰聲華未修望履之勤  
 遽有交符之契簸糠揚粃不自意於居前藏垢匿瑕  
 尚卒叨於餘蔭嚴冬屆候行李在途循惟跋履之勞  
 默有神明之佑

除左司謝宰相啓

仰止三台方極掃門之願藐茲一介遽叨推轂之勤  
 顧何幸以當能慄不知其所措常謂治道莫難於今  
 日圖功宜急於任賢故凡朝廷之官皆爲擢用至於



宰相之屬尤號要司贊紀綱出納之權茂省闈彌綸之望名雖別於左右事咸總於劇繁異時臺閣華資間由此出有若廟堂餘論亦或與聞惟遊東於名流乃克堪於器使顧如某者將焉用之材無博敏之稱學有迂愚之誚仕中都者八任自揣何功更靖康之初元始從補歲月謾淹於待次馳驅靡効於平反正合投間敢期妄進上方考御其相端欲收委任之功命曰惟暨乃僚庶幾獲同心之助殊不自意辱此誤恩茲益伏遇某官夙高衛社之忠懋贊經邦之業載專揆路益峻民瞻支大厦於將傾獨任棟隆之吉

秉洪鈞而密運坐施工宰之平耻一事之或失其宜收羣材而各致其用肆時掾佐採及庸虛詳整自持固無及古人之事勤勞可効誓將酬國士之知

復待制謝宰執啓

罪如山積方置散於窮鄉恩自天回遽叨榮於邇列撫躬何以得此承命不知所云伏念某學不造乎古人性難諧於世俗頃從踈遠誤辱明揚幸得陪兩省論議之餘亟欲報千載聖神之遇笑王孫之失問肯懷媚竈之私多謝息之能官獨信挈瓶之守煩言可

畏素志莫移

張相自之遇字下敗云雖知進未能知退每懷據蒺之憂然守道不如守官姑



盡挈瓶之智慮無一得逮聞禍發於駭機始覺身危

於累卵屈從薄責仰荷洪仁懲沸吹壘一飯敢忘於

往咎看山柱頰終身已分於長閒不謂孤蹤驟蒙渥

澤釋其罪罟寵以恩綸多病早衰竊隆名以畢桑榆

之景雙親益老資厚祿以奉菽水之歡獲幸為多歸

誠有自此蓋伏遇某官奮庸上宰允迪大猷

傑躬秉國鈞絕朋邪以開眾正之門拯陷溺而與自新之

路謂觀過各於其黨或公論之可申顧於人無所不

容豈一責而遂廢有如疵賤亦與甄收謹當欽佩訓

詞恪守名節參西清之鴛鷺已容叨昧於明時挂神

武之衣冠尚覬矜從於宅日情之所感言不能文

通朱相啓

逃違鼎席四序倏其將周屏伏衡門尺書曠而弗嗣

坐念闊疎之迹曷勝慚懼之心仰恃洪私尚垂簡照

恭惟某官學窮今古道貫天人蚤膺巖夢之求遂陟

台符之峻挺夷險之一節更勤勞之百為子儀再造

唐家名高而朝不忌叔敖三相楚國功大而身愈卑

自遭閔艱亟解機務方奪情於優詔俄力請以終喪

隙駟如馳慨祥琴之既御鋒車促駕趣召節以非遙

卽覲宸庭還登揆路瞻儀刑於舊德大恢復乎新疆



華陽集 卷之三十一  
庶寬宵旰之憂式副黔黎之望某夙承眷獎預切傾  
依徂暑屆時尚炎威之未解明神來相諒素履之多  
祥願益保綏下符虔祝

賀趙相冬啓

黃鍾應律肇基四氣之和紫極當陽共和一人之慶  
維時上宰與國皆昌恭惟某官偉德望以端朝輔聖  
神之休運載安社稷全濟黔黎天地爲鑪獨秉甄陶  
之化河山作誓尉高帶礪之勲茲茂對於初陽宜倍  
膺於多福益隆國棟永贊皇圖某謬忝官聯過叨獎  
予瞻言衮席曾莫預於進趨跼伏衡門但彌勤於祝

頌

丁父憂服闋上宰相啓

門牆掃迹一終俄紀於周星里社偷生尺素莫通於  
記室非仰恃於高明之照敢自踈於舊賤之知惟是  
傾瞻不忘寤寐恭惟某官載登鼎席獨運廟堂同德  
一心具著彌諧之効參天兩地丕昭寅亮之功維巖  
益峻於民瞻隆棟遂彊於國體以內則境土復版圖  
之舊靡煩一鍤之施以外則戎虜交玉帛之歡行迓  
兩宮之返惟茲盛事從古罕聞中興之期可坐而策  
眷乃衰殘之迹曷勝訟詠之私哀制甫終顧無階於



望履商飆方厲願益保於冲襟  
兩宮服闋上執政啓  
逃違台席不知歲月之流屏伏衡茅莫貢寒温之問  
念夙承於眷遇敢自置於閑踈宏度所臨愚衷必鑒  
恭惟某官名垂宇宙義薄雲天素韜廊廟之姿出際  
休明之運臯夔並駕精神足以折衝揚馬同時文章  
益其餘事自入參於大政乃益勵於深忠用宏經世  
之規坐坳丕天之緯皇威克振版圖俄復於齊疆虜  
氣潛銷宗社再安於周鼎惟茲盛事云云同前

賀鎮江孟郡王到任啓

伏審光膺制詔出殿翰藩下車云初闔境相慶恭惟  
某官懋昭今德允迪大猷孤忠久簡於上心重寄獨  
當於方面江山改觀草木知名大纛高牙方迓鎮臨  
之寵耕田鑿井已銷愁歎之聲自念餘生夙欽高義  
顧養痾於閭里未遂披瞻惟竊芘於帡幪實增欣幸

賀張樞密冬啓

律應黃鍾肇一陽之獨復氣調玉燭先四序以均和  
履德之基順時以正恭惟某官當朝宿望濟世元勳  
茂迎剛長之宸坐享朋來之福全師保勝折衝將靖  
於邊陲舍爵策勳爰立佇歸於廊廟顧如孱瑣夙荷



華陽集 卷之二十八  
春知命數多艱適有負薪之疾筋骸難彊莫逞細柳  
之趨瞻望門牆第深祝頌

賀朱相冬啓

義畫分爻陽應地雷之復周正建子法垂象魏之和  
品彙時亨賢哲道長恭惟某官功存廟社名在鼎彝  
坐迎日至之辰順履朋來之福仰梁公於北斗獨推  
耆德之高起謝傳於東山佇慰蒼生之望惟茲朽鈍  
夙荷眷知千里瞻言短羽莫陪於燕厦八年遠迹舊  
陰徒想於桃蹊

乞再任宮祠上宰相啓

屏處丘樊仰鈞衡之在望寢更歲籥曠竿牘而弗修  
唯有傾瞻不忘寤寐恭惟某官位尊上袞德冠三階  
立社稷之殊勲自生民以來而未有修祖宗之故事  
雖百世不易而可知公道方行斯文不墜山甫中興  
於周室子儀再造於唐家蔚高不世之名允屬當朝  
之傑眷言孱瑣忝迹簪紳橫草無功心甚慚於犬馬  
負薪有疾齒遽迫於桑榆方貪竊食之安再力奉祠  
之請所期終惠以苟餘生兀若朽株顧難勝於風雨  
渠然厦屋願永託於帡幪

賀鎮江汪內翰到任啓



伏審錫命中宸更符巨鎮旌騎方聞於厭境閭閻已  
浹於歡聲某官德配古人名重當世獻納蚤膺於皇  
眷文章獨挾於天庭粵從清切之班屢出蕃宣之寄  
雙谿疊嶂固未厭於登臨一札十行俄復頒於寵渥  
以鐵瓮江山之勝付玉堂詞翰之宗風醇而獄訟不  
繁事至而笑譚可辦汲長孺之治民清靜信臥閣而  
有餘黃頰川之下詔稱揚諒追鋒之不晚顧茲朽鈍  
久辱眷知占籍治封正賴併蒙之庇杜門臥疾尚稽  
桑梓之恭緬想光儀但增欣抃五言詩  
賀鎮江蔣龍圖到任啓

伏審十行奉詔閔煩飛輓之勞一水揚舳就屈藩宣  
之寄歡聲載路和氣回春某官學富家傳才優世用  
早踐更於中外獨藹著於聲華木牛流馬之功方仰  
資於國計皂蓋朱轡之寵俄易畀於藩條佇見褒嘉  
亟躋禁近顧如未契幸竊餘庥尚稽恭梓之儀敢後  
馳牋之敬五言詩

賀鎮江鄭侍郎到任啓

伏審一札十行詔趣甘泉之舊雙旌五馬寵臨方面  
之雄下車云初闔境相慶某官高文華國厚德鎮浮  
蚤聯清切之班備罄忠嘉之節均勞既久屬望彌崇



上方思見賈生將召還於宣室民固未忘汲黯聊借  
重於淮陽仰瞻師帥之賢已服神明之政眷言未契  
久闊英游少須當力於病衰尚冀復承於謦欬

賀鄭侍郎年啓

單闕肇歲正四序以履端象魏布和率萬民而觀治  
化工有俶賢路方亨其官名簡上心望高方面載肅  
藩條之舊茂迎寶曆之新皂蓋行春已布宣於德意  
鋒車就日將入侍於皇明顧此病衰莫遑展慶光塵  
在望祝頌彌深

丁母憂服闋上宰相啓

憂居苦次罔知歲月之徂竦仰槐庭莫貢寒温之問  
念夙叨於甄冶敢自弃於闕踈內省孤衷伏深大懼  
恭惟某官位冠羣后名震四夷咸有一德以格天得  
伊尹自任之重思兼三王而施事致周公旁作之勤  
時旣得矣而身愈恭愛莫助之而功益懋整乾坤於  
兵革搶攘之際奉虞舜以解憂還風俗於祖宗全盛  
之時大周宣之復古凜凜帝王之佐煌煌社稷之勲  
遠稽厥初獨立無二然且謙虛而下逮不緣踈賤以  
遐遺凡具識知悉同依仰某分窮命薄福過災生銜  
恤去官痛難勝於哀慕變除終制恩實賴於矜存尚



念餘生欲襄大事顧無材不可爲悅捨干祿莫知所  
安自躍不祥儻鑪錘之未弃雖悲涕洟庶窳窳之有  
終輒陳悃幅之私妄有祠宮之請退量僭率冀獲哀  
憐

賀黃郎中年啓

曆占堯象出日方賓歲啓夏時建寅爲正恭惟某官  
蔚高雅望臨寵巨藩政修鼎取之新序協泰來之吉  
明神攸介福履具宜皂蓋行春方布和於闔境紫泥  
封詔遂趣駕於追鋒顧此病衰莫遑展叙

賀鎮江張朝議到任啓

久闊英標阻奉尺書之間忽聞新命下臨方面之雄  
豈惟慶師帥之得賢亦以慰朋游之素望瞻懷甚邇  
歡抃可量某官學造古人文推作者趨時適變而才  
無滯用奉法遵職而治有能名肆膺廊廟之知特畀  
藩維之寄眷此南徐之地實分北顧之憂江山勝絕  
而民醇租賦樂輸而事簡旣消辰而視印果來暮以  
騰謠似聞將促於追鋒正恐不容於暖席某居然尸  
祿老矣就閒緬惟森戟之嚴曾是布衣之舊每念青  
編之共學獨憐華髮之墮顛不自意於衰頹復有依  
仁之幸儻未忘於雅素當修請謁之儀庶卜暇時略



談故事惟涼秋之屆候諒福履之具宜願益保綏副  
茲虔祝

蘇朱回鄭侍郎賀年啓

璇璣占象仰七政之回天寶曆頒時慶三元之肇歲  
仰止一都之會粹然九牧之賢阜益朱轡已肅班春  
之令清都絳闕將嚴就日之趨顧馳慶之未遑忽飛  
牋之先及拜嘉有覲佩德無窮  
華陽集卷第二十八

華陽集卷第二十九

金壇後學于文熙校

左啓

賀執政冬啓

氣行無間一陽進而朋來福生有基萬寶滋而萌動  
惟時盛德與國同休恭惟某官名世鉅賢端朝碩輔  
奮文章之大手領袖諸儒竭啓沃之深忠丹青萬化  
協千載風雲之會冠百工柱石之良茂對昌時倍膺  
殊祉佇正鈞衡之拜益崇廊廟之瞻不間邇遐實同  
抃喜某叨恩祠館屏迹鄉枌緬想光儀徒深頌禱



賀鎮江王尚書年啓

歲且更始與物偕昌福生有基惟人所召伏惟某官  
公才獨步時論同歸輟從清切之班來重藩維之寄  
長江流惠比屋興誼象魏之布始和坐擁春祺之慶  
晉康之錫蕃庶行膺晝接之榮顧此病衰久於庇賴  
仰光塵之在望叙桑梓以猶賒徒有頌言少伸悃悞

回鎮江請赴鄉飲啓

式序賓賢莫重習鄉之禮欲知王道必觀稽古之文  
眷此盛儀行於會府宜選期頤而有德庶參賓介以  
無慚曾是繆庸猥蒙寵速摛詞甚過揣已奚勝仰和  
樂而不流固願得陪於席末惟暮年之多病實難自  
彊以階升非敢固辭尚祈照亮

回金壇請赴鄉飲啓

伏審虔奉新制舉行習鄉持枉翰牋俾倍賓位屬有  
眩昏之疾難自力於進趨緬懷揖遜之儀但彌勤於  
瞻頌

回葛丞謝解啓

伏審棘闈較藝賈餘勇以先登鸚薦飛書超羣英而  
得雋凡預交親之契同增歡抃之誠馳慶未遑貽牋  
遽及啓牘載披於麗藻玩詞彌服於高才感佩之私



華陽集 卷之二十九  
敷宣罔既

回宋知縣啓

伏審拜命九重字民百里竊聽輿人之誦雅知今尹  
之賢某官才兼衆長望重一世官不擇地聊欲試於  
絃歌治有能名諒難淹於朞月顧茲衰朽久服芳華  
自憐投老之蹤將有依仁之幸方圖遣問忽奉飛牋  
披溢美之英詞荷高情而增愧

回葛丞謝及第啓

伏審恭承大問摛章獨拔於天庭光被殊榮唱第寵  
登於仙藉士夫相慶科舉得人某官識稟天材文傳

世業書破萬卷窮學海之淵源筆掃千軍擢詞林之  
根柢方瑣廳而應詔遂發策以決科志諧捨舊之圖  
恩拜維新之命顧如賤息久竊餘光同爲蟾窟之遊  
猥符謙誨退念鯉庭之訓有愧前修惟慶謝之未遑  
忽牋函之先及過情得譽拜賜彌慚

回張察院啓

睽違英標阻貢牋函之問忽聞中詔茂膺憲府之除  
士論僉諧朝綱允肅某官學窮千古心醉六經文章  
華國而有餘蔚高大手譽望得君而益重峻陟清途  
况當日治之朝尤難風憲之任職分六察身率百寮



鷓鴣搏空已振霜威之屬鴛鸞接武佇躋法從之嚴  
遂究設施深符屬望某辭榮簪紱臥疾山樊知言路  
之有開覺歡悰之倍集鬱然枌梓旣分同社之榮暮  
矣桑榆更切餘光之照心所甚喜言不能文

賀陳相冬啓

召陽以律應復卦之初爻求端於天建周正而布治  
惟時碩輔與國同休恭惟某官道貫三才智包九德  
棟隆廣廈納四海於帡幪坯就一陶鼓羣生於橐籥  
神人底豫夷夏輯寧茂對令辰備膺嘉貺某叨恩洪  
播屏迹窮鄉緬想槐庭阻造承顏之列恭馳竹素敢

稽事貴之儀

回秀州張守啓

丘樊屏迹誤被弓招綸綍䟽恩遽當銓部顧衰殘而  
曷稱徒震懼以彌增徼倖惟多寅緣有自伏惟某官  
德高時論名簡上心茂建州麾夙著勞能之效行躋  
禁路益觀施設之方特假吹噓以及庸陋曾未伸於  
謝悃忽先辱於誨函謙以與人仰佩過情之譽歉然  
揣已奚勝流汗之慚

回折端明啓

伏審光奉中詔寵臨大邦政令一新士夫交慶恭惟



某官躬蹈九德心潛六經負王佐之英才獨當妙簡  
委樞庭之重任屢罄嘉謨方自託於退閒忽起膺於  
圖任揔一路兵民之寄寬九重宵旰之憂坐席未溫  
威令先騰於南海追鋒已趣台躔還拱於北辰益展  
猷爲用符屬望某謬尸榮祿夙仰光塵貢只尺之書  
尚稽郵傳荷謙虛之德先墜芳函感佩以還敷宣罔  
既

除參政回兩府啓

叨承命綽擢與政機用過其材感深以懼方今聖主  
之在御獨奮乾剛而有爲所以任承弼之臣必將責  
事功之實顧如某者何以當仁念才術之空踈矧年  
齡之遲暮挂冠得謝久絕望於恩榮乘傳趣還復叨  
官於禁從未閱周歲遽陟近司懇辭莫遂於循牆危  
懼有同於據疾此蓋某官急賢人之引類明上臣之  
事君借以褒揚致茲忝冒謙詞俯逮旣曲荷於推前  
重任難勝更願聞於善後

知婺州回兩府啓

病辭機政冀休養於餘生恩畀輔藩尚叨塵於煩使  
荷皇慈之曲被撫衰質以奚堪竊惟寶婺之區近接  
王畿之化溪山明秀歌八詠於先賢風俗安恬揖二



仙之遺範將使承流於昭代必惟名世之偉人有若  
耄昏初無才術遭逢興運濫陪四近之聯龜勉暮年  
媿乏一毫之補已追嚴誅而竊幸敢分樂土以偷安  
茲蓋伏遇某官華嶽三峰明堂一柱貳公洪化密參  
寅亮之權偃兵息民坐賚安疆之道樂君子成人之  
美體聖君優老之心特假吹噓致茲忝冒郡條始布  
方圖貢於柔緘郵傳遽臨乃先貽於誨翰仰佩謙抑  
曷勝悚惶

回監司賀冬啓

氣回初律一陽進而上行道協亨時諸福備而畢至  
伏惟某官才優公論名簡上心暫駕輶車增重觀風  
之任行趨召節遂通持橐之班茲允迪於昌辰宜朋  
來而受祉方期展賀遽辱惠音輒附致於柔緘用陳  
悃悃第感銘於謙德莫罄敷宣

回宣州樓樞密啓

貳政暮年初無補報分符千里誤玷寵靈揣暮齒以  
奚堪覺慙顏之有覲伏惟某官清朝先達當代老成  
輟經濟之宏才暫承宣於巨屏雙溪疊嶂雖多暇日  
之娛黃閣紫樞政復須賢之久佇膺召節歸覲凝旒  
某自顧叨逾出於庇賴王事鞅掌欲修謝而未遑君



華陽集 卷之二十九  
子撫謙辱貽牋之先及其如悚佩莫罄敷宣

回鄰郡賀年啓

王正肇序聿新布德之元君子履端丕擁自天之慶  
伏惟某官探原奧學經世宏才追三代以同風久去  
詞林之直長萬夫而觀政暫煩臥閣之賢茲坐對於  
春祺宜鼎來於召節遂還清禁益懋遠猷某假守鄰  
封夙霑河潤念未遑於展賀乃先辱於貽牋佩德何  
鮮兩心有愧

回董直閣賀冬啓

郊迎日至天子歛福以錫民道與陽外賢者對時而  
膺祉某官才惟世用仕結主知畫枕青縑早流聲於  
省戶朱轡皂蓋久借重於江城茲逢剛長之辰竚趣  
召還之命某養痾如舊賴芘尤深欣一線之添長稍  
延暮景望雙旌而阻造但祝多祥

賀鎮江楊少卿到任啓

伏審暫輟禁途聿臨會府溫言錫寵知委任之非常  
今日頒條聽歡謔之已洽伏惟某官身兼數器名動  
九重踐揚清切之班具著忠勤之績三章弼教釋之  
久誦於無冤千里擇賢長孺果聞於借重蓋欲革外  
輕之弊豈徒寬北顧之憂諒暖席之未遑趣追鋒而



亟下靜惟衰朽夙荷照存投老鄉枌方依仁而竊幸  
贊名賓祀期力疾以猶艱輒寓牋滕少伸悃幅

賀鎮江韓尚書到任啓

伏審光奉除書寵臨會府旌麾照日開八座之儀刑  
條教回春聳萬夫之觀聽伏惟某官立朝雋望經世  
長才夙遭神聖之知具著忠嘉之績上星辰而聽履  
班蚤冠於甘泉集鞞袴以迎郊威旋行於南服茲甫  
祥琴之御載膺符竹之分以長江控扼之邦付三輔  
勅裁之手真成假道看即追鋒眷言投老之蹤曾是  
同寮之舊治封占籍託芘賴以云初賓祀贊名困衰  
遲而阻遂聊陳干牘少達悃悃

賀趙直閣冬啓

聖人設卦驗剛長於復來君子對時協道亨於泰內  
某官鈞深敏識濟務宏才學探淵源夙著間平之譽  
政先慈惠遠追召杜之風方順序以迎釐宜自天而  
錫寵眷言朽質幸託餘庥久闊笑談未遂賓儀之展  
緬懷祝頌敢稽慶牘之修

賀都統劉太尉到任啓

伏審光奉十行總提萬旅先聲遠暢奠國勢以彌尊  
嚴令初頒肅軍容而改觀伏惟某官大忠奮發妙略



沉雄當四郊多壘之時立萬世不刊之績破匈奴而  
趙邊無犯孰先李牧之奇兵敗符堅而晉祚中興獨  
賴謝元之決戰勲昭彝鼎名動華戎夙登大將之壇  
屢剖价藩之竹眷江淮之列戍實輦轂之上游易畀  
中權載識倚毗之重佇宣優詔趣外宥密之嚴某久  
仰英猷幸依洪芑渙音始布共欣朝論之公衰迹深  
藏未遂賓儀之展聊陳短牘少述鄙悰

賀趙直閣年啓

漢殿受圖禮隨時正侯藩謹朔德與春回伏惟某官  
慶襲仙源學窮聖閭屢屈分符之寄益恢拔薤之規

占歲事於八風方勤勸課拜宸恩於三接佇躡清華  
眷此衰遲久於庇賴莫遂舉觴而獻祝敢忘削牘以  
馳誠

賀都統劉太尉年啓

順三陽而畫泰曆紀新元大一統以書王慶均列辟  
伏惟某官名垂宇宙功冠旂常暫分細柳之屯增重  
長城之勢比膺宸眷旣趣覲於凝旒願納春祺亟進  
裨於闕袞某棲蹤蓬巷矯首轅門阻稱椒栢之觴聊  
致牋滕之禮其如祝頌罔罄敷宣

賀方敷文冬啓



先王治曆方考驗於初陽賢牧撫民已召回於和氣  
某官望高時彥德配古人久踐劇繁屢試發硯之刃  
行躋禁密益搏運海之風茲茂履於復亨宜大來於  
泰吉某心勤桑梓迹遠旌麾念君子之得時阻陪賀  
旅撫衰悰而竊抃姑寓柔緘

回曹教授啓

歸老菟裘漸忘世故仰高泮水尚隔風儀敢期婚對  
之求遂辱牋滕之貺伏惟某官文摛黼黻學探淵源  
惟樂其義而利其仁故仕既久而未嘗干進然弼諸  
中而彪諸外雖時未遇而莫掩蜚聲方英主有爲之

朝乃志士圖功之日恩華可跋闕闕增高况聞謝氏  
之芝蘭已造孔門之堂室欲諧嘉耦宜得名宗猥及  
衰微何勝悚佩指長途而附驥切欣盛德之可親執  
敝帚以掃門深懼弱孫之弗稱倉惶裁謝草率爲慚  
尚冀高明曲垂簡照

賀鎮江李寶文到任啓

伏審拜命楓宸輟清班於卿士升華寶閣分劇任於  
侯藩師帥得人里閭交慶伏惟某官機深燭理才大  
濟時簡上帝之心方在朝而美政通當世之務更治  
民以考功眷長江扞敵之衝正萬旅交馳之會擇賢



而授倚重惟深佇觀襦袴之成謠復指鷓鴣而接武  
退循衰病首託庇庥未卜造門先承惠翰

賀李寶文年啓

三陽應律方順履於新元五馬行春已召回於和氣  
某官名高簡帝才大濟時聯西清邃密之班壯北固  
藩維之勢師益公之清靜頒條每戒於烹鮮被黃霸  
之稱揚歸覲佇看於儀鳳載臨端月益介繁禧某迹  
遠使旌心傾談麈緘詞尺素莫殫善禱之私竊陰甘  
棠徒極偷安之幸

回王運使啓

仰止英標未卜趨承之便辱先榮翰過形褒借之勤  
自揣空疎何勝愧感伏惟某官才高瑞世學奧窮源  
擅剖符持節之權著騰實蜚聲之美蟬聯緒業久傳  
江左之風流烜赫功名行冠漢庭之班列某稟生極  
陋投老無庸聞卜宅於鄉邦喜棲蹤於德宇病衰成  
懶已稽削牘之恭渴想增懷尚冀披雲之幸



華陽集卷第三十  
 雜文  
 衆會黃錄青詞  
 庶類貪迷凡有生不能免死千劫受報非上聖無所  
 祈哀用申不忍之私仰瀆蓋高之聽昨自國家多難  
 始於胡虜內侵甲兵散以雲屯盜賊從而蜂起兇焰  
 所及玉石俱焚慘毒不勝川谷流血况飢寒癘疫之  
 所迫害雖羽毛鱗介亦或殘生宇宙之間禍災若此  
 諒彼各償於宿負豈無橫及於非辜自變起不啻十

華陽集卷第三十

雜文

衆會黃錄青詞

金壇後學于孔蕪校

庶類貪迷凡有生不能免死千劫受報非上聖無所  
 祈哀用申不忍之私仰瀆蓋高之聽昨自國家多難  
 始於胡虜內侵甲兵散以雲屯盜賊從而蜂起兇焰  
 所及玉石俱焚慘毒不勝川谷流血况飢寒癘疫之  
 所迫害雖羽毛鱗介亦或殘生宇宙之間禍災若此  
 諒彼各償於宿負豈無橫及於非辜自變起不啻十



年所殺傷難以數計觀露骸積尸之處痛長夜以何  
歸披黃錄白簡之文尚冤冤之可釋輒憑衆願虔啓  
真科或各誦於靈篇或同修於淨供哀多益寡近悅  
遠來伏精懇以上昭庶神明之可格伏願高穹下監  
列聖垂休照冥途而洞開灑法雨以沾沐九州萬里  
潜消鬼哭之聲六道四生永脫輪迴之苦

設醮青詞一

乾坤大造難述恩慈草芥微生何施報謝惟忱詞之  
自竭庶陳露而必聞伏念臣身荷國恩官無吏責合  
家口衆坐竊於安榮有母年高獲供於祿養顧茲薄  
陋何以堪任况因祈禱之私數免憂虞之禍恭承慈  
護彌積震惶乃消日於初元用歸誠於法會伏願上  
蒼昭格下鑒愚衷消无妄之災已曲推於全度定長  
生之錄尚永昇於康寧

二

患無大於有身實賴神明之祐福莫長於無禍敢忘  
祭薦之恭仰叩洪慈具陳丹悃伏念臣稟生愚拙竊  
國恩榮身為法從而家居官無吏責而廩食歲時溫  
飽老幼康寧欽承大造之私錫此闔門之慶况乃賤  
息頃赴官期嘗暨親姻共伸齋禱旣追瀆神之譴更



華陽集 卷之三  
叨從欲之仁僥倖滋多凌兢罔措伏願高真降格列  
宿昭回赦除冒犯之愆臨享潔蠲之素自天獲祐息  
凶禍於無形與時皆昌垂子孫而不替

三

天道玄微蓋不言而善應人心懇切斯有感而必通  
受賜實深撫躬增懼伏念臣愚不聞道老尚貪生但  
知竊祿以安居豈有微功而報國苟逃陰譴旣荷神  
休更虞子婦之災曾露禱祠之懇仰叨洪造悉獲清  
安是用虔啓真科具嚴法供庶殫精恪上動監觀伏  
願列聖旁臨大慈普濟福輕乎羽敢期純錫之六來

禍生有胎所冀潛銷於未兆

四

太始無形彊名曰道至誠有叩如響應聲用自竭於  
愚衷冀仰塵於聰聽伏念臣賦性頑鈍遭時盛明進  
不能陳力以事君退不能修德而善俗奉身竊祿浮  
食挺災乃從去夏以來幼穉多嬰於疾苦嘗以私情  
所迫懇祈妄瀆於明靈由是舉家悉蒙全慶上竊厖  
洪之施不勝感戴之誠爰卜元辰聿嚴淨供伏願祥  
光下燭惠澤旁流特寬冒犯之誅尚鑒精虔之志旣  
安且吉錫難老於桑榆俾熾而昌藹餘芳於蓬蓽



五

受國恩深莫伸於報效闔門口衆更迫於疾殃仰銜  
洪覆之私虔瀝謝生之悃伏念臣稟生薄陋晚歲遭  
逢再仕明時躡賚萬機之重累叨睿澤更霑三族之  
榮去家幾閱於四年携幼殆逾於千里卒逃橫禍重  
反舊鄉顧庸繆以何堪皆聖神之密佑况緣病苦嘗  
賴保全茲因冒貢於微誠併用荅還於先願伏願芬  
芳上達靈鑒俯昭赦其黷犯之愆錫以安平之福宦  
途出處已曲荷於厖鴻暮境身心尚永離於障難

六

物壯則老難逃病苦之憂天於于民尚啓祈禳之路  
旣叨蔭祐敢忘熏修伏念臣仕歷四朝年彌七紀自  
念平時之出處無非道力之保持福過灾生忽纏痾  
於下體月來日往幾可厭於頽齡嘗暨兒曹兩干神  
造剗心俟命旋踵蒙休夫何朽邁之餘猶辱哀憐之  
賜爰因今日祇按仙科期盡展於初心更仰希於後  
福伏願飈游倏降淵鑒俯回灼知懇迫之私加惠衰  
疲之質盡蠲沴氣注金簡以增年普燭恩光均蓬門  
而協慶

七



年彌八帙繆先五福之稱恩自九霄敢忘一純之薦  
伏念臣受形濁世竊祿清朝退憐命數之多奇常慮  
色身之難保皇慈俯逮旣幸昇於殘骸道蔭均霑復  
喜登於中壽仰被厖鴻之賜曷勝感戴之情迺卜元  
辰虔修淨供式敷謝悃希續頽齡伏願天鑒孔昭神  
釐來下納丹誠於螻蟻駐末景於桑榆欽一人而悅  
千萬人咸羨久生之樂行百里者半九十里更祈永  
命之休

追薦皇考黃錄青詞

禍延所怙莫報劬勞痛極終喪不勝摧割輒冒益高  
之聽仰陳罔極之私伏念臣夙負丕愆頃招大罰自  
興悲於陟岵嘗瀝懇以籲天未盡孝思奄及祥祭慈  
顏益遠無路攀號法力可憑用嚴齋禱所冀監觀於  
精懇早蒙拔度於幽靈伏願亡考某官覺悟真心歸  
依大道出三塗之寒夜長觀光明滅四趣之苦因往  
生快樂

醮新宅青詞一

環堵肇新仰荷憐蒙之賜蘭場夙啓虔伸豺獮之私  
伏念臣蓬葦故栖風雨莫芘勢當改造旣經始於先  
臣責在肯堂用續成於治命僅違秋隘稍就規模三



華陽集 卷之三十一 五  
歲訖功屢黷陰陽之禁一家攸處同傾報謝之心幸  
元夕之甫臨顧落成而敢後有嚴法會庶達忱誠伏  
願上聖垂慈列星回照吉祥萃止潛消妄作之凶少  
長咸宜永享安居之福

二

土木妄興深負震驚之罪雲天下覆敢稽禳謝之儀  
伏念臣聚指猥多結廬甚隘久欲命工而增築慮黷  
陰陽頃因從宦以去家遂鳩徒役鑿舊山而開址穿  
積壤以居楹規模僅足於一區功力行周於三歲每  
虞招釁常再禱於神休茲幸落成用併陳於法會伏  
願高穹垂鑒列耀回光由衷俯察於信誠輕動潛消  
於悔吝上棟下宇永觀風雨之除幼子童孫咸賴帡  
幪之賜

母親慶壽醮青詞

五福在人咸羨久生之樂大慈立教曲施從欲之仁  
輒露忱誠仰祈臨照伏念臣身叨榮祿志在奉親堂  
有母慈年踰中壽雖左右就養每欣駒犢之從然造  
化密移已迫桑榆之景顧餘齡之難恃撫危慮而靡  
寧恭案真科虔敷法席冀達由衷之款乞延難老之  
期仍叩真靈預求恩護伏願高真下監列聖垂休憐



華陽集 卷之三十一  
臣愛母之私實由本性察臣籲天之懇非敢爲身特  
俾親闈益增祿筭浹餘恩於見在身外齋後果於未  
來世中儻獲慰於母心庶少安於子職

追薦皇妣黃錄青詞

禍莫大於喪親難勝追慕道常先於救物用極號呼  
伏念臣稟生多艱無母何恃永負劬勞之德莫申孝  
養之勤罪逆所招煩冤極自營覓之初逝固齋薦  
之屢修尚慮前塵未超淨域爰當卒哭再竭哀誠回  
生前祈禱之私作身後追崇之報伏願明靈昭鑒列  
聖垂慈化形遍滿於十方開度不遺於羣品庶遷幽

爽頓釋愆非徑上朱陵徃生快樂

禳松虫設醮青詞

大鈞播物莫先動植之恩沴氣爲災敢廢禳禳之法  
蓋此方之衣食多仰給於山林眷言弱植之松將備  
異時之用爰從近歲忽蜚蠹之潛孽乃至滿山皆蠹  
食而槁死顧殘生之已甚更遺育於方來非假威神  
何能撲滅是用恪修淨供披露忱詞仰祈常善之私  
亟下惟新之令所冀物無疵癘氣復和平卵生化生  
乘靈光而滅度甲者拆者洗法雨以蕃滋載歌行葦  
之仁復見牛山之美曲全地利盡荷天慈



禳兵災黃錄青詞

地接邊

待兵之禱天從民欲爰推削死之恩

祇按明

謝悃伏念臣微生遲暮幼累猥多昨

虜騎之

土師之弔伐軍聲振野暗鋒鏑於江

淮殺氣千霄巨煙塵於里社遁逃則莫知所向憂懼

而無以自安是用罄竭丹誠歸投金錄冀哀矜其迫

切俾脫免於凶災逮茲經歲以平寧蓋本至仁之覆

護肆涓穀旦虔啓法筵期展盡於初心更消禳於後

患伏願高穹悔禍厚載流謙錫景祐於皇家蕩妖氛

於紫塞坐令廣宇悉陶至治之風下及私門長享安

居之樂

追薦皇妣禮觀音疏語

威神自在發大願於慈悲功德無邊作衆生之依怙

念我慈闈之愛遽躔陟屺之哀圖報重恩唯祈善應

伏願愚衷上格慧澤旁流十方普現方便門出沉寃

於翳路一切同歸解脫海悟空覺於前塵

二

神通具足空覺極圓是爲淨聖尊能作功德海發不

思議大願普現十方救無量劫衆生盡脫諸苦念我

先妣已經大祥欲永離於冥途須仰憑於象教爰因



華陽集 卷之三十  
禪宗載啓法筵伏願妙智所臨靈寔如在回心向道  
早覺悟於顛倒因緣轉身受生常逍遙於極樂世界  
追薦長男禮觀音疏語

塵緣結習衆生未免於輪迴法力掃除一切同歸於  
解脫眷言亡子奄弃盛年恐罪障已積於多生致靈  
識或沉於厚夜用嚴淨供仰叩威神伏願火捨慈悲  
爲加哀憫開示超升之路俾從快樂之游悟五蘊空  
即見非相入三摩地遂證無生

追薦李氏水陸疏語

六趣苦因漂流不斷三乘妙力拯救無邊載藉方便  
之門大啓冥陽之會加持秘密聲徧徹於十方厭飫  
飢羸澤音霑於一切聿崇勝利用作薦嚴孺人李氏  
伏願仰仗恩光盡蠲罪累永離濁世悟空相於迷津  
親禮慈尊聽法音於淨土



華陽集卷第三十一

金壇後學于文熙校

雜文

祭張彥智文

嗚呼天生偉人堂堂傑異既博於才抑豪於氣悼往古之不返追流風於末裔躬信義而急人處阨窮以游戲妻孥困而號啼賓客喧其沓至苦俗態之卑陬納圓鑿於方枘獨昂昂以在羣思雲飛而孤唳觀負抱之如此宜少見於行事誦平生之所為亦表表於當世方建炎之巳酉海內俶其鼎沸渡五馬於烏江



守孤城之如塊駭盜兵以環拏顧最爾其何恃仗忠  
信而出郊逆首渠以單騎解血刃於垂及曾一鏃之  
不試倏移帥於廣陵膺戎虜之孔熾略旁州以煨燼  
眇千里而睥睨公開門而待之衆果却而遠避賴尊  
俎之折衝赫威名而逾厲天子異其材能詔徙近而  
作蔽惟建康之都會委荒城而晝閉招餘孽於散亡  
謂非公其誰治卽銜命以入境咸息黥而補劓出閭  
閻於瓦礫洗江山於昏翳弔野鬼之沉寃布春耕於  
新惠觀施設於三州曾未盡其一二俄感物以懷歸  
動尊鱸之逸思叩帝閣而露章拜琳宮之仙吏反故  
鄉以訪舊侶漁樵而求志方却掃以就閒肯輕身於  
權媚昔先祖之定交俾通家以相繼結盟好於金石  
沐芳馨於蘭蕙有如某之薄陋辱知過其子弟甫弱  
歲而承顏勤白首以無替每暇日之招邀吐肺肝而  
自誓走童僕之歡呼極芳鮮於庖蔽傾家釀之新芻  
投車轄以留醉粲一笑以相樂率百金而屢費鄙後  
出之纖巧獨純誠以見謂迨之官於番陽慘離情而  
分袂阻萬山而道遠馳緘滕以來諄謂兵戈之未息  
將會面之難值徵斯言之不祥卒永隔於下地嗚呼  
哀哉歛不摩棺葬不臨隧邈音容而遐想撫汎瀾以



出涕驚祥祭之甫臨纔一拜於墓次旅肴酒以致奠  
跽陳詞而略意後時而來心則有媿

祭外祖母倪氏文

恭聞令德發聞自初歸我外祖蘭芬藹如外氏族大  
母儀是勗靜專柔閑不戒而肅曷彰厥善是生叔舅  
起家白屋士林之秀帝欲用之召從百里安輿迎侍  
象服煒煒孝養方隆命也不弔訃音自南痛靡有極  
追念蒙愛誨言具存歲時間見視猶已孫中山遄歸  
一拜堂上曾未閱歲遽哭遺像嗚呼哀哉人亦有言  
五福罕備亦旣備矣則又兼貴况復有子諸孫滿前

相其令終尚何憾焉唯是慈訓永隔千古莫以致哀  
淚墮如雨

祭丁明仲文

嗚呼明仲藹茲令德何辜于天而奪之亟夫好名者  
爭尺寸之進而趨利者競錐刀之直孰如明仲有官  
不仕欣然自適日散千金了無難色此其高情逸韻  
視夫世俗之規規何啻十百而千億也方且左琴右  
書枕流漱石舒幽思而嘯詠對清樽以朝夕友先賢  
於三徑五柳之間與之合堂而同席若其考古論今  
旁搜遠撫或深入佛海或直造聖域以至醫經神巧



之功地理陰陽之贖吳陸畫手鍾王筆蹟莫不極精而研思毫分而縷析嗚呼明仲旣賢而又多能胡爲不壽一病至此極也雖然人生如夢百年瞬息達人

大觀何得何失惟典刑之徂盡後來無所矜式念此風俗使我心惻矧予葭莩之親契好薦於疇昔航一水以相過每論心而莫逆嗟桑榆之暮景期林壑以遠迹誦招隱而振衣指迷途以先迪將駕言而從之忽千古之永隔嗚呼哀哉日月如駛及此窳窳懷話言其如在邈高風以寥閭踈陳詞而莫訣揮老淚之橫臆

祭張彥度文

同姓所先友義相勗惟公於我愛均骨肉初公南來歲在乙酉客中見我傾蓋如舊卜居吾邑契好日親趣舍利害有懷必陳爲飢所驅宦游契闊繾綣不忘書無虛月佐幕兩州鳴琴三縣至輒有聲銘鋒稍見衆驚且喜抱能將施公曰休矣善刀藏之奉祠歸來我方屏處白首對談過相勞苦曰惟此身來日無多一笑相樂吾其敢踈別去未幾話言猶在命也不淑忽焉弃背嗚呼哀哉公兄寶文我之先友國士期我親愛篤厚斯人旣沒典刑在公不憊遺一吾誰與從



華陽集 卷之三十一  
豈無交游莫如公久四十五年夢覺何有聊陳薄奠  
送公西山追懷曩昔淚下逆泉

祭胡氏碩人文

人之家法實由中饋允矣令德流芳必異仰惟碩人  
生有殊質歸我舅氏見謂良匹承上撫下以身周旋  
達于宗黨靡有間言婦順母儀既克兼備凡厥家事  
不嚴而治舅方從宦進蒙上知曰惟在公皇恤我私  
匪其弗恤閭職有付處不失宜吾復何預暨登法從  
內助益勤湯沐疏封絲綸載新一時光寵有燁其盛  
豈無所本惟德之令謂宜百年永膺福祉胡爲一病

遽至不起嗚呼哀哉昔我外祖有子三人伯仲蚤世  
叔也獨存天旣相之俾克顯大曷又抑之而奪其配  
我爲其甥劬勞念母時過外家庶慰孤苦骨肉同體  
舅惟我親碩人遇我親愛惟均親之愛之義則有舅  
如已子弟恩久彌篤去冬之別言猶在耳方卜再見  
遂隔生死訃音初聞哀極號慟何哀之極母黨爲重  
瞻彼下湯歸窆有期永懷懿範胡寧忍違恭陳薄奠  
侑以楚些情見乎辭聲淚俱墮

祭陳美成文

粵惟陳氏世有令德如公父祖我幸及識先德往矣



典刑在公方嚴厚重有祖遺風尚其家學博文約禮  
篤志不倦惟公是似再世濟美亦既兼之以戒以守  
厥譽四馳譽之云何曰誠長者修身齊家飾以儒雅  
顧我衰遲里閭相屬佩服典常蘭芬蕙馥乃以女孫  
爲其子婦冀聯姻好相親以久孰云一病遂至此極  
堂堂若人何去之亟逾五望六壽則不允族半青紫  
時獨不逢皇天畀付不充有命有德有義不逢何病  
餘慶流行在其後昆身雖永已不亡者存詞以寫哀  
一別千古尚想平生淚墮如雨

祭甥丁伯升文

嗚呼吾甥氣貌堂堂何賦分之多蹇而受命之不久  
未孩而孤既孤而病或者以爲不祥惟吾令妹獨有  
是子不幸而娶居曰吾尚何爲乃切自慕於共姜我  
先大夫與先夫人日夜念之欲奪其志以嫁而妹以  
甥之故指天自誓凜然有甚於秋霜觀夫守義若是  
則其所託於襁褓者厚矣譬猶草木之芳固將封之  
植之擢危根而孤秀期拱把於千章以吾甥出於積  
德之後且夙承其母訓又有伯父叔父教以義方吾  
故謂甥異時必能自立而襲其餘慶浩乎其未可量  
也豈知事有大繆年未及冠而天奪其母零丁一身



蓋僅存而若亡有婦甚賢亦相繼而下世豐猶未已  
又哭其長子之喪夫憂患百罹至此極矣嘗試推否  
泰之消長尚庶幾其享後福而壽康奚慘罰之太甚  
嬰此微恙而禍變卒駭於非常嗚呼哀哉甥舅恩義  
如何可忘獨捨我以先去其孰知余心之惶惶而况  
平生志願命有所制百不一償我是用追悼反復爲  
出涕而淋浪雖然有形同歸於幻滅一死何足以悲  
傷顧或脩而或短等炊夢於黃梁聊摠詞以寓意薦  
餘哀於一觴千古永訣歸安于藏

祭舅李侍郎文

惟公與我親則爲舅道義之交實同朋友故或出或  
處一話一言未嘗不竭誠盡心以相佐佑如何天奪  
之亟一病遂至於不救嗚呼哀哉公生我後十有三  
年我之知公蓋自其幼有若梗楠豫章擢於喬林雖  
拱把之微已見其蔚然而孤秀及其長也讀書考古  
夜以繼晝議論英發智略輻輳則又若騏驥驊騮一  
日千里駸駸乎得夷途而馳驟故常自謂材高者必  
能高舉器大者斯可大受於是發策決科蜚英騰茂  
當聖主收人材致太平之時能自拔於輩流躡羣英  
而並造內而法從之嚴外而大郡之守獨以望實得



之易若取諸懷袖且天之生公既畀以能名又寵以  
祿厚是將全其所亨而終以期頤之壽不謂令德壯  
猷方植而仆痛功名之雅志曾萬分之未就嗚呼哀  
哉公之材氣剛明諒直蓋天性之自然無所矯揉以  
是而遊於世故能任誠無欺狗義不苟雖遇事煩劇  
而蟠根錯節交乎前必使之毫分縷析情窮理究如  
庖丁之解牛迎刃若然顧何勞於擊剖此固公之所  
長而人亦以是稱公同一辭於萬口初公罷官而歸  
以病來告亟往見之猶能爲我彊起握手道舊頗怪  
其二年之別白髮蒼顏氣消容緇方咨嗟而歎惜公  
忽笑曰子言何陋人生固有一死孰先孰後譬猶客  
寓時至則行何畏之有以是見公胸中所存死不足  
以動之而况世間得失利害其又奚疚追懷曩昔每  
聞擊節慷慨之談必有以發吾覆今我老矣事乃大  
繆母存之念旣絕同心之盟莫副命也不淑安所歸  
咎情慙恍而愁思淚淋浪而噎嘔聊陳薄奠詞以爲  
侑諒靈竟之未遠冀萬一於三嗅

祭叔排岸文

昔我先君唯叔同氣兄友弟恭華鄂鞞鞞于時燕私  
某每侍旁一話一言敬佩典常先君旣沒嗟我何怙



華陽集 卷之三十一  
儀刑所瞻獨有叔父恩義載昂慰此孝思如何不弔  
叔又弃遺嗚呼哀哉堂堂吾叔得官歲晚材不及施  
有言莫踐浮沉里社夏屋渠渠既富且樂宦達誰如  
謂宜百年享有全福七十非夭唯曰不足人曰不足  
叔也何憾有子若孫卜安于坎如某蹇薄老去疇依  
杖屨未遠舉目煙霏陳詞莫訣以寫哀慕詞莫究哀  
淚墮如雨

祭弟彥飾文

昔我先祖頎然五孫皆以世業種學績文季孟之間  
君勇且仁屢戰詞場誓將策勲事既大謬弃如飛塵

浮沉里閭坐閱紛紜被褐懷玉匪琢而珍昂昂今姿  
野鶴雞羣氣有拂膺怒髮衝巾心豈芥蒂卽之也温  
是謂坦率一笑一頓曾莫矯揉任吾天真自其少小  
我固知君允矣直諒古之德人宜壽百歲率俾風淳  
云何不淑奄忽沉淪嗟我老矣來歸鄉枌交游零落  
其誰與親賴有諸弟異戶同門花月風煙欣然一尊  
情久彌篤謂當終身君遽捨我悲哉良辰壽雖未極  
甲子越旬生雖不達子孫訖訖數則有盡不亡者存  
亦可無憾安于丘墳唯是老懷痛茲天倫想念疇昔  
悽愴蒿焄酒殺如生冀來清竟嗚呼彥飾聞乎不聞



祭弟彥深文

嗟予生之多艱舉一世而少徒矧投老於窮巷交游散而益踈獨三弟之鄰牆分戚休而與俱每論心而莫逆撫芳辰以自娛粵己卯之徂夏鴈序折而稍孤念過從之鮮歡猶二季之相扶曷沉痛之未定君又弃余於半途愴餘年之無依籲蒼天其何辜嗚呼哀哉才踈而通莫之或攄心和而平退然守愚不知者謂君藏蓄之深而獨善知之者未嘗不歎其優游卒歲得保身之令圖頃一病之沉綿氣駿消而莫甦冀藥石之可恃竟奄忽而云徂紛華萼之凋悴復誰憐於朽株老懷悽其感傷泣涕淚而盈裾設豆觴之菲奠視生平而不殊幸清菟之一歆歸卽安於山隅

祭談彥才文

嗟我有生逾八十年親戚故舊壯歲滿前水逝舟移去者紛然獨吾彥才相視華顛暇時過從一尊留連話舊論心情久益堅曷又厭余弃之而先念茲惻惻有懷孰宣嗚呼彥才和易周旋喜愠如一舉鄉推賢平生康彊五福幾全晚見其子服榮官聯天報善人可無憾焉唯後死者無徒自憐去年之冬微疾已纏扶杖過我諄諄話言猶冀後會約期禁煙豈謂永訣



遽營新阡我老艱出空望堂筵一奠寓哀淚下迸泉

謁文宣王廟文

某去聖已遠學道不工叨恩竊祿領茲獄事大懼不能任職然嘗聞諸夫子聽訟猶人必使無訟某雖不敏請事斯語尚其降鑒有以相之

謁諸廟文

某叨被誤恩當一路按舉之職自視薄陋疇克以濟惟神宅靈此邦功德顯茂尚其陰相庶免大戾即事之三日敢用虔告

華陽集卷第三十一 畢

華陽集卷第三十二

金壇後學手孔兼校

雜文

祭皇考文

父兮生我恩同於天孝養永違攀號不逮日月如駛奄經寒食顧瞻墳土宿草方春追慕慈顏獨闕幽壤匍匐叩地肝心潰裂念此孤藐無父何怙天命不弔敢誰怨尤嗚呼哀哉酒斝芳馨恭致薄奠旨甘之奉不異平生庶格靈寘鑒此哀懇

祭皇妣文

哀哉



某積惡深重禍延先妣喪期迅速既就外除痛念劬勞大恩莫報號天扣地無所逮及嗚呼哀哉蓋聞死者謂葬爲藏故體魄降地乃始有歸不肖之孤是用不敢忘窀穸之事謹卜七月六日敬奉靈輻祔于先君中大之墓恭惟先妣三年在殯音容浸遠猶有几筵得以朝夕號慟慰孝思萬一今也歸窆泉壤永隔慈顏雖欲升堂摩棺想像如在殯時豈復可得唯有生存拊育慈愛追慕感咽無有窮盡嗚呼哀哉嗚呼痛哉母子之愛如何相捨禮當即遠忍痛莫訣

焚黃文一

圓丘祭天禮成肆赦是爲國家大典歲在戊申肇舉於維揚迨今十五年矣天子聖明干戈載戢海內綏靖乃復舉舊章以幸天下凡厥有官自通籍而上恩皆及親德至厚也我先考昨已累封官至中散今茲被命加贈一等進爲中奉大夫嗚呼自葉流根天澤也根不植者葉不茂惟昔中奉植德自晦陰貽後人是使不肖之孤襲其餘芳竊有祿位叨榮以貢先壠謹擇令辰跪奉綸綍告于尊靈尚想平生膺受光寵惟是慈訓永隔不勝感涕哽噎之至



嗚呼父母大恩天地罔極如何可報獨有朝廷命數  
霜被幽壤庶以慰孝思萬分乃去年冬天子親郊謁  
款紫壇禮成肆赦凡厥在位自通籍以上均釐錫福  
咸得顯榮其親故先考昨累贈中大夫今加贈大中  
大夫先妣已封太令人今隨先考秩位加贈太碩人  
蓋寄祿之官遷至太中大夫則秩比法從非示優寵  
不輕畀付而命婦之於碩人非其夫若子官與太中  
比亦不以封嗚呼漏泉之澤自葉流根吾君待遇臣  
不可謂厚矣某竊伏自念坐尸榮祿無尺寸功而蒙  
上恩渥如此豈某不肖所能自致哉實我考妣積德  
垂慶効見於今追念生存何所迨及謹用易袍帶更  
冠帔奉天子所賜告黃躬致薄奠以焚獻于尊靈酒  
殽芳馨哀誠懇切冀儀忽悅庶克顧歆

三

某頃自政和甲午登上舍弟歷官至今四十二年矣  
中間得謝里居無復仕宦意遭遇明天子慨然圖舊  
召還朝列以今年八月二十五日蒙恩擢參大政乃  
遵舊典封贈三代官於是有司定議曾祖贈太子少  
保曾祖母朱氏贈普安郡夫人皇祖贈太子少傅祖  
母太安人王氏贈齊安郡夫人皇考正議贈太子少



師皇妣碩人李氏贈咸安郡夫人絲綸既下舉族蒙  
福仰惟朝廷崇尚孝治凡搢紳通籍於朝者遇國慶  
賜咸有追榮之典唯東宮三少列郡夫人則非二府  
之先不以封恩至渥也某竊伏自念材智淺薄何以  
辱上恩遇實由祖先積善種德其發有時乃俾後人  
叨被餘慶今茲天澤自葉流根上及三世非特顯揚  
幽光抑使不肖之孤知其所以進冒爵祿者蓋有所  
自也某以官職有守未得歸省丘墓躬展孝誠謹遣  
男具官某其官某賫所贈郡夫人告一通上冢焚獻若乃生  
平行實所以致天子褒寵之意則具載訓詞伏惟尊  
竟如生祗服新命以永苾于後嗣尚饗

四

天子以去年冬十一月郊見上帝禮成肆赦遂舉封  
贈之典故皇考自太子少師加贈太子太保皇妣自  
咸安郡夫人加贈大寧郡夫人蓋東宮官有三公有  
三少太保公之列也封號之格有大郡有小郡大寧  
郡之大也潛德隱耀與位俱升綸言下告光動閭里  
某不肖竊國厚恩略無補報既老得謝光被顯親之  
澤教忠在耳且感且慚謹洎今日上冢焚黃躬致薄  
奠庶格靈享



國家設官之法天子置三公三少而東宮亦置焉命婦之號封國者稱夫人而列郡亦稱焉其名雖同而尊卑等級固有次第去年冬天子將郊見上帝有司旣戒而彊吏以虜騎侵軼聞乃詔改卜唯是慶賜之澤凡所以寵綏列位者斷自長至一切以舊典從事惟我皇考歷東宮官至太師矣今加贈少保是爲天子之三少遂正一品先妣累贈郡號今加榮國夫人升郡而爲國蓋亦視一品而爲稱訓詞褒美紛梓輝耀敬念先考妣之德積厚而不施用能傳芳後人膺此異數某老矣不復能報國恩但當以疇昔教忠之言貽厥子孫庶或克承以慰地下之望躬陳薄奠展墓焚黃想像生存哀榮感切

冬至祭長男文一

陽來爲復君子道長誰不逢時舉家相慶我獨何辜罹此凶禍上堂莫哭旣失慈顏回視兒曹又不見汝惟汝婦子伏拜我後纍纍衰經舉目傷之我哭我母心折欲死而汝諸孤哭汝不已我今垂老衰病日迫俯仰若是胡寧久生聊因令節酒殺致奠來止歆茲慰我悽惻



惟人之情莫親於父子雖壽夭之既定有生而必死  
吾固知之而猶於汝感咽痛悼懷之不置得非情之  
所鍾觸緒感發有不能自己者耶嗚呼去年寒食汝  
初病時謁醫三茅十日而歸今復見此令節汝獨冥  
漠去無歸期餘三尺之孤墳委宿草之紛披悽然念  
想涕泗交頤觴酒豆肉今豎携以奠汝靈竟未泯知  
乎不知

祭李氏孺人文

嗟人生之必死兮如夜旦之有常惟體鬼之降地兮  
故謂葬以爲藏哀夫君之下世兮當暮秋之肅霜胡  
馬紛其南騫兮盜賊乘時而陸梁遍雲擾於江淮兮  
孰不憂心而惶惶徙君柩以旅殯兮計實出於倉忙  
經嚴冬之冰雪兮倏又見夫春陽委靈骨於草莽兮  
空丹青之在床每一念而興哀兮未嘗不揮涕淚而  
淋浪也嗚呼哀哉卜觀基之高原兮山深而水長消  
二月之壬午兮今日吉而時良舉窀穸之大事兮冀清  
竟之樂康歎吾年之垂盡兮置壽藏於汝旁將百歲  
以同歸兮胡能獨處而悲傷就新塋而結屋兮陳薄  
奠之潔芳考古誼以卽遠兮不復祖載於中堂追懿



德而莫返今斷九回之危腸諒精誠之未泯今醕永  
訣之一觴安萬古之幽宅今期終焉而允臧

祭孫女文

爾之生也稟姿聰慧居室則爲淑女旣歸則爲賢婦  
言德功容無一不備吾閱人多矣如爾之婉嫕夙成  
者蓋亦鮮儷奈何天不與齡春花始榮遽歎凋瘁嗚  
呼爾之歸寧也欣欣送迎本期抱子而還侍豈謂禍  
生不測呼吸之間遂至永弃念十有九年之所爲覺  
成毀之須臾殆如夢而如寄人誰不死惟爾之死年  
不及壯病不及藥繼嗣未立竟單骨寒所以使吾舉

室寃痛號泣而不能已也惟家廟無祔姑之文而婦  
人有從夫之義是用舉爾靈櫬以翌日吉辰登舟復  
歸于江陰之曹氏至若葬祭之厚薄時日之遠近則  
一在爾之夫而吾不當復經意也去年四月結禱出  
門今年四月棺與川逝人非木石之無情行路亦爲  
之流涕觴酒豆肉聊作終天之訣雖陳詞千萬不能  
寫吾悲哀之切至也

李公朝奉墓誌銘

故右朝奉郎李公諱華字君儀今左朝奉大夫知平  
江軍府事朝正之父也其先出隴西世遠而分有居



建康之句容者不知其所以徙僞唐兵亂又避于溧陽遠郊因家焉故公爲溧陽人曾祖曰瓌祖曰俊父曰憲三世逮公皆晦迹不仕公享年八十有六建炎三年六月乙亥以疾卒于家十月壬寅葬家之西五里曰下湯之原其後平江歷仕以恩累贈公至今官乃移書其甥張某曰先人潛德隱行宜有辭于後世而葬迫兵火不暇乞銘於今二十四年矣子其念之公於某爲外祖知其平生顧莫詳於某者且舅命也何敢辭惟公純直簡諒貌莊而溫方其少時於流輩中已見推重父沒居喪毀瘠盡哀母老得疾廢于牀公垂泣憂懼遂置家事不問而專意奉養抱持臥起進粥藥以至盥悅纖悉必躬必親故其身不出戶庭而衣未嘗解帶如是者十餘年莫知其有晝夜寒暑人以爲難尤篤於友愛同氣五人從容季孟間上承下順相親以睦內外無間言平居安閒喜怒不形於色而家法益整與人交恭順而有禮自敵以下至於庸人孺子接之必盡其意初不以長老自處人有過惡絕口不道爲覆護之唯恐弗及有田十餘頃歲水旱誓不一言減縣官租自其先世已然而公守之尤謹穀翔貴亟發廩平價以食其一方虛甑待炊者以



千計大觀政和間蝗數害稼羣飛下其田輒去不食旁畝愧駭且以相告公曰偶然爾勿復言蓋其謙抑不欲近名類如此嗚呼人之行莫大於孝友而心之所存推以接物莫先於忠厚是二者衆可能也唯公得於性之自然而行之終身不變乃與衆異故以是修於家交於人而信於鄉里當是時雖三尺之童聞公之名莫不率教而自勉有若桀黠無賴亦知畏公之義不敢犯分以爲非夫以流俗之難化而公能使之愛慕說服如是其所謂一鄉之善不言而信者歟公先聚周氏再聚倪氏皆贈令人子男三人長曰蘊

前公卒次日茂亦卒於公葬之明年其季卽平江也女一人適張氏是爲某母贈碩人孫男女十六人曾孫男女二十七人初公倦于家一日宴坐召三子誨之曰蘊與茂汝治生有法宜勉力以輔吾老曰朝正汝篤志於學可出從士大夫遊立身揚名以太吾門由是二子力生業不去左右而平江辭入太學不數年登顯科釋褐而歸人皆以爲公榮而公亦自喜有子以適其志也雖然公之所積者厚天將報之其後必大以顯而傳永久豈止榮一時而已哉今平江以材見用於朝歷禁從典輔藩赫然爲時聞人則旣大



且顯矣公雖不及見而漏泉之澤自葉流根亦足慰  
地下之望以是知李氏之興公實積之而平江發之  
繼自今勿替於前則餘波寢廣浩乎其未可量也某  
既得論次公之羣行至於爲善獲報可垂訓於後人  
者尤不敢略則又爲之銘銘曰

建康古邑惟瀨之陽李氏世家至公而昌厥昌伊  
何種德惟茂惟孝惟友濟以忠厚一鄉稱善公不  
自伐人各有知心服以悅謂此耆老性合天道監  
觀在上其必有報天既報公享有全福又錫之子  
大發其蕃發不自躬匪時不逢以積慶基垂耀無

窮下湯之原高山水遠碣此銘詩式勸爲善

金壇縣放生池記

紹興十三年夏五月有以唐放生池言於朝者皇  
帝若曰嘻此仁政也有唐規制狹陋流澤不廣宜有  
以侈大之即日有詔下其事諸路行焉鎮江三邑金  
壇地最居下號爲澤國其民習網罟而嗜殺越五年  
左宣教郎趙公稱來宰是邑入境問俗愀然弗怡亟  
取詔伏讀曰皇帝盛德好生而吏媮弗虔物未蒙惠  
今不免其何以逃罪乃相縣治東南不能一里得窪  
田焉近市無喧在野不僻溪湖流派以回繞島嶼分



峙以相屬遂命度以爲池視田之直幾何而償不損其價計工之費若干而役不奪其力以十月旣望庀徒經始决沮洳縱鋪而濬之爲深十尺縱廣百步有竒繚曲堤而面方植嘉木以環蔭凡役三十有五日而池成清曠浚潔寒波激隄野色交映外與天際渺然有江湖千里之思於是作亭其北憑高而下臨焉旣又設關鑰嚴厲禁使往來者有時而漁盜毋得入明年天申令節宰乃躬率其佐若邑之士大夫會于池再拜呼舞大贖生縱之百族鉅細脫鼎鑊自適蓋不可爲量數邦人聚觀無不以手加額而致華封

人所以祝堯之意且曰吾君之德及於物也深矣昔文王有靈德以及物而民樂之請以德及名其亭使吾邦人歲歲來會臨斯池也登斯亭也以樂吾君之德不亦可乎宰曰謹奉教遂狀其事以來屬爲之記臣叨被恩寵念無尺寸功以報今幸目覩盛事願有紀述以歸美萬分固不當以文字曖昧不稱爲解蓋聞天地之大德曰生聖人誠參天地贊其化育不忍一物不遂其生者仁之至也夫羽毛鱗介物之甚微而人所不加恤以一人之尊有天下之富而於甚微人不加恤之物惕焉思有以生之則其至誠惻怛所



以加惠元元者可不論而知矣是以善言治者必以鳥獸魚鼈草木昆蟲咸若其性為治之極考觀唐虞三代之隆其功效靡不在茲而尤備見於成周之世騶虞靈臺行葦皆其詩也天下誦而歌舞之至今不息何其盛哉我國家以仁德受命聖聖相繼惠綏萬方皇帝陛下躬神武不殺之姿光紹前列戢兵御名罰視民如傷海內晏安無一夫不獲而宸衷惻隱猶恐渥澤未孚戕斃天物故斯池之作創新增舊徧于郡邑要使有生有形一皆陶粹飲和不復罹暴殘之苦信乎至德流洽下澈淵泉矣將見天地之間潤澤

豐美庶類至於蕃殖風俗化為忠厚論功較德比隆成周區區有唐誠不足道嗚呼非天下之至仁其孰能致此孔子曰仁者壽又曰大德必得其壽大哉仁之為德也以所施乎一邑者觀諸郡以所施乎一郡者觀諸天下在在處處恩被動植生之育之而其所施也無窮其施無窮則天之報之也豈有窮哉是以既醉者太平之詩也君子萬年天實錫之假樂者嘉成王之詩也子孫千億天實申之臣不佞敢拜手稽首以是二詩請祝聖人此非獨臣之志也亦邦人之願也



安樂國序

余自少多病藥裹關心人有善方輒就抄錄久之集  
其所得疏爲二十八條名之曰安樂國閉門無事臥  
游國中閱蟲鳥草木之變擢其可用俾各効靈庶幾  
身獲安樂非敢以醫爲事也而丁氏甥伯升性頗似  
舅亦復好蓄醫方從予求得其本喜津津見顏間若  
將用是救人疾苦者余謂甥之用心則善矣然此不  
可易也用藥當如用兵藥有方猶兵之有書孫吳之  
書行於天下舊矣兵家者流舍此無以勝敵而霍去  
病乃謂顧方略何如不至學古兵法得無以權術之  
妙有非書之所能盡者要在變而通之自得於言意  
之表則戰勝攻取暗合孫吳蓋如是然後爲名將嘗  
試考觀醫方種種之病無所不療然病有一變而變  
不同藥有同功而用各異精微之旨方豈能述斟酌  
損益存乎其人而後生晚學僅能窺其藩籬便謂世  
間之病吾已盡得按方投劑可使立愈意直微倖於  
一中曾不知毫釐之失爲害滋大可勝惜哉古人有  
言知兵之將人之司命今余所集二十八條皆安樂  
國中兵也尺籍伍符指呼在我苟得其要則麾左而  
左麾右而右可以出奇應變策勲於五苦六辛之間



如其不然暗中殺人雖不以挺與刃相去幾何嗚呼  
此真不可易也御名之哉

華陽集卷第三十二 畢

金壇後學于文熙校

華陽集卷第三十三

雜文

異鶴記

神仙之說尚矣世人以其事不常有而莫之信夫事  
不常有而一旦出於耳目之所接殆非人力能致則  
傳記所載有不得不信者某舅氏左朝散郎提舉江  
州太平興國宮李公某之夫人胡氏紹興二十年十  
二月癸卯以疾卒越二十日公用道家法爲夫人薦  
冥福於茅山之元符萬寧宮方至山欲登殿有羣鶴



不知所來向殿飛舞少焉一鶴繼至合十有四徘徊  
上下食頃乃去又四十九日當明年二月庚戌夫人  
既葬復有鶴翔于公所居第廳事之前如元符所見  
之數其一亦後至去地三丈許兩兩成列凝然不動  
若俯若仰其勢各殊日光射之輝彩眩目鄉人爭覩  
爲快稍喧忽盤旋作西北向去未數十步有白雲十  
餘族從後湧起飄至鶴所如銀山雪浪鶴舞其中元  
裳縞衣或現或隱良久雲合不見觀者歎仰咸謂夫  
人仙去今日乘鶴來歸嗚呼異哉夫人孝事舅姑克  
盡婦道舅沒姑且老奉養尤謹食飲衣服必躬必親  
調芼之不精澣濯紉縫有所未善必反復之可其意  
乃敢以進姑有疾臥起以夜繼日倦卽坐而假寐如  
是者兩月體瘦至骨立顛沛不少懈人皆稱爲孝婦  
居家雍睦忍辱無爭處心仁慈重殺物命媵侍有過  
曉譬之不見責怒里族有貧不給者隨所有以施予  
無嗇意嘗謂日用之物生於天地而人力成之不敢  
妄費至若盥濯之水亦不過量方感疾夢一道士揖  
之使前寤而曰吾其逝矣是夕奄然而化四日而後  
斂體柔膚澤容色如生日瞑而光不毀溢出睫間數  
道如線又左額髮際有物如金珠浮動半日家人以



手掬之輒失去蓋夫人平生爲善出於天性雖大修行人有所不及而孝行尤著宜其卒也有異於人矣古之得道者多尸解仙去而或謂鶴爲仙人騏驎蘇耽丁令威之徒去而復歸皆從以鶴以所見乎今考所聞乎古是邪非邪不可得而知也姑撫其實以紀大略云

書刁倪老挂劍帖後

刁倪老行年七十有五而氣貌不衰出入起居如少壯一日携八座胡公挂劍帖來示余曰吾老矣嘗預作死計求挽詩於胡乃得此他日吾有不諱胡以詩來卽瞑矣余竊恠之曰挽詩所以寫哀特爲死者作也公方矍鑠示人意象未肯伏老何忽須是不祥莫大焉公曰然寓形宇內百年一瞬人若不自悟也今吾幸有田疇足以給衣食有詩書足以遺子孫結廬數椽青山相對翛然終日家自釀酒不問美惡客來輒醉自謂如此已足了一生尚何求獨送死一段正須料理念於胡有葭蓍親知我平生莫胡詳也吾故欲其有作以慰地下嘗見陶淵明旣述五柳傳又作文以自祭白樂天亦傳醉吟本末而自銘其墓二公皆前世賢者猶汲汲於身後老夫不能文也求詩於



華陽集 卷之三十三  
人以待盡雖愧陶白不猶愈於貪生而忘死者乎余  
三復斯言然後知公爲達因語公曰公壽骨高當享  
期願誰能爲公移書以謝季子寶劔誠大惠也欲挂  
在二十年外且請洗削藏之母以迫人公大笑因命  
書于帖後

恭題賜帶御書

臣仰惟 皇帝陛下總攬權綱慨然念治登進羣彥  
中外布列而尤惠顧近輔以禮終始之廼紹興二十  
有七年九月辛未以臣上章引疾乞罷參知政事奉  
外祠詔弗許懇請數四特除資政殿學士知婺州辛

巳旣臨遣又敕中使馳至江亭賜臣御書一封通犀  
帶一條以寵其行臣自初有請凡三對便坐愚衷委  
曲盡荷聖知慰諭憫憐恩禮已極敢意非常之賜復  
此下逮跪捧慚懼莫知所措因竊自念材力駑下得  
謝久矣一旦蒙召用再忝從班不閱歲遂參國論任  
益重報効益無聞加病且老分當擯棄尚何足惜而  
於其去也乃軫 皇慈念及衣服之微而假以異數  
如此非獨臣拜寵若驚一時觀瞻駭歎亦謂比年所  
未有也嘗聞周宣王之遣申伯則以路車乘馬命韓  
侯則以淑旂綏章蓋侯伯分土而守天子思所以大



鎮撫之於是乎有賜然二賢之美特託詩人以傳後  
至若人主親御翰墨發爲奎章錫命自天昭示隆眷  
則以今視昔萬萬有光焉夫宣王能御微接下故其  
臣無不自盡以奉其上臣繆列侯爵守茲南邦膺受  
渥澤庶幾跂望古人惟是德不足而榮遇過之大懼  
弗克欽承以隕越于下區區自盡之忠其敢忽忘旣  
襲藏寶帶傳示不朽復以宸翰恭勒堅珉不唯繼二  
詩以侈上恩抑將使學士大夫知君父所以待遇臣  
子之意各思自勉云

題祖誥

某自牝角聞先祖少傅言家舊有唐朝告勅數卷三  
張族長主之今不知安在蓋張氏本河朔人有仕唐  
官于潤者因家金壇分派而居張橋赤岡希墟各爲  
一族歷年旣久張橋赤岡失其世次唯希墟家譜見  
於石刻自先考太師而上七世諱登者爲希墟始祖  
合前二族號三張家其間世次旣難盡考亦莫知族  
長爲誰以故祖誥藏匿不出紹興四年某自給事中  
罷歸暇時集宗黨諭意密令搜訪又數年始得之乃  
上柱國銑揚州六合縣主簿連制書二通幅縫舛脫  
字多漫滅至有零落壤甚不可識讀則去之而取其



華陽集 卷之三十三  
可以編次者命工裝爲一卷題曰張氏唐朝制書唐人善筆札觀此書墨跡一一可愛又郭尚父李司空賈元靖皆元勲重望而蘇顧奚徐亦一時勝流列名其上自乾元至今傳四百餘年開卷一讀如見乎其人竦然生敬開寶初南唐違命侯猶未歸朝方欲調兵旅拒而遠祖嘗以衣冠戶攜是書免充軍名卷末有二徐署銜卽鉉錯兄弟也舊云三通一十七縫今亡三之一又寶應貞元年號以脫縫先後不倫而二徐書押亦無復見皆爲可惜嗚呼張氏衣冠其來舊矣二祖在唐雖以官微事業無所見然其流芳餘澤傳及後人已墜而復振則當時慶源所積可不論而知矣某老病豈能久生恐來世不知宗姓本始故特爲題識凡我子孫宜謹藏之

跋洛神賦摹本

曹子建賦洛神正如說夢虎頭癡絕遂以爲畫本僧步隆又從而摹之人物態度恍如目擊是邪非邪着想顛倒以見世間種種虛幻仗法莊嚴便爲實相有能悟解諸法海一切應作如是觀

跋醉道士圖

被褐祿藜不受戒杯盤狼籍無籍在浪說蓬萊三萬



里醉鄉便是仙世界

### 跋江貫道畫山水

老江畫山水造微入妙一時好事者訪求遺墨幾與隋珠趙璧爭價不知明仲安所得此宜善藏之無使通靈之物變化而去

曾中丘壑發之毫素居然有萬里勢閒窻永日鳴琴對之便覺衆山皆響

### 跋洪慶善先夫人丁氏詩文手墨

夫人賢而有文蓋得於慶善所作誌銘舊矣今又見此遺篇字畫勁麗詞致清婉使人三復竦然余雖姻家不及一拜堂上然風味不凡自可想見抑知誌銘爲實錄也

### 跋丁氏手簡并剛巽詩卷

剛巽頃任國子監丞余官太學相從甚久爲人純篤雅重有前輩典刑今卽世不知幾年一見遺墨恍如對面愴然久之又得其女慶善先夫人所寄女弟手帖真草累幅皆閨房箴訓情致繾綣若不能自己者以是知夫人篤於恩義蓋有似其先人云

### 跋張叔元所藏山谷覺民帖



山谷勸其弟姪讀書一帖中三致意焉丁寧懇切唯恐其或怠蓋非獨私其弟姪而已凡厥後學皆當敬佩斯言永以為訓

跋山谷大字

能鼓琴者識琴能擊劔者識劔故必能書然後知古人筆法叔元出示豫章公墨蹟一卷余手拙不能書何足以識之但見其行草變態縱橫勢若飛動而風韻尤勝非得夫翰墨三昧其孰能臻此公嘗謂蓄書者以韻觀之當得其髣髴今反復此帖知公言為確

跋寶晉帖

余家舊有米帖數卷兵火中失之其間一紙叙京口江山形勝最為奇特或謂有瘞鶴銘苗裔今觀此書筆勢雄彊大似京口帖使人對之恍然念青氈不忘也

擬進御試策題

朕紹開中興夙夜求治有年于茲而道未方古罔知攸濟乃慨然興念視前日之政有不便於時者若小若大成飭而正之於是按滯淹放姦回而收人材之用削繁文遵舊典以清法令之原懼刑罰之寃濫則



許其昭雪使之自新憂財用之耗蠹則蠲其羨餘爲  
之節省以至嚴取士之科而惠實學頒求言之詔以  
通下情內則選命臺諫開公正之路大肅朝綱外則  
御名擇牧守奉寬恤之政亟紓民力是數者皆方今之  
要務斷自朕志次第舉行冀有以合天下之公而庶  
幾乎先王之盛夫唐虞成周號稱極治而其書具存  
有國者所當法也以今日之所爲驗之於其書尚慮  
講究之未詳推行而未盡子大夫彊學待問其爲朕  
然之究之伊欲祖述憲章悉其條貫使先王之治復  
允於斯時必有可言者詳著于篇朕將虛心以聽焉

### 婺州勸農文

仰惟明天子念稼穡艱難躬耕以先天下而詔至郡  
國又每以勸農爲首德至渥也夫體上德意奉行詔  
令實太守之職方時東作田事旣飭是用率僚屬入  
阡陌携酒與肴招父老而飲食之且告之曰力田爲  
生之本汝所當知情輸自安越其罔有黍稷宜各率  
乃子弟庠乃錢鏹以朝夕從事毋忽異時高廩萬億  
於此乎取之是豈獨富於家以不負其力抑將使太  
守涉筆占位書勸農之職爲無愧云

### 洪宅求婚書

長子堂  
繼娶



夙欽門閥謬忝鄉鄰頃幸接於台光既叙葭莩之舊  
 茲用忘其寒族具存孿婉之求竊以某人粗謹過庭  
 久虛中饋伏承某人騰芳甚早擇對惟時敢因媒妁  
 之言願合婚姻之好委禽効贄顧篚實之不豐鳴鳳  
 再占尚逢門之有耀儻納愚悃恭聽嘉音

丁宅求婚書

次子 堅

序人倫之本禮莫重於成婚御名世睦之情義敢忘於  
 求舊以某人方逾幼學行卜好述伏承某人秀發閨  
 房譽宜家室輒藉行媒之告用伸合姓之誠齊鄭相  
 親顧雖慚於非偶潘楊有自諒無替於前修卽俟嘉

音永以為好

丁宅納幣書

婚姻以及時為貴詩每戒於三星男女非受幣不親  
 禮必先於五兩惟某頃歲有請行媒幸既冠以成人  
 宜納徵而授室實茲筐篚用陳不腆之儀恃有葭莩  
 尚監未將之敬其如冒浼徒積兢慚

荅丁宅求婚書

大婚為萬世之嗣具載格言納采居六禮之先遽承  
 華翰惟令姪孫學已親於師友而小孫女教未習於  
 組紉念結褵而願為有家固先求舊况許嫁而言猶



在耳敢背厥初聞命以還歡悰曷旣

朱宅求婚書

三孫鑒

合婚爲重敢攀閥閱之崇同氣相求願附葭莩之末  
小孫登仕郎某粗服膺於古訓幸及齒於成人伏承  
令女某人慶分相葉之光德茂公宮之教輒憑媒氏  
仰締華姻圭筆家風雖自慚於非偶金蘭世契諒無  
阻於好逑上瀆高明佇聆嘉命

荅錢宅求婚書

長子孫女

大婚爲重且載格言同氣相求遽承謙誨伏審令長  
孫承務稟天材而粹美紹家學之淵源而某孫女某

人教方習於組紉職未勝於灑掃旣辱行媒之諭克  
協鳳占輒忘家世之平繆希蘿附欽聞嘉命倍切欣  
悰

荅錢宅請期書

女子願爲之有家已奉通婚之約吉事卜先於近日  
遽聞親迎之期雖告虔之贊未修而傳命之郵遠逮  
欲辭不可爲愧徒深

曹宅求婚書

四孫鑒

鄰邦相望夙欽閥閱之高二姓通婚願卜絲蘿之好  
雖慙非偶蓋喜同聲伏承令姪女某人傳慶大家已



深明於女誠而某弟四孫通仕郎某誦書黃石私竊  
慕於祖風既寅緣姻婭之有初且考驗著龜而協吉  
匪媒不得先馳尺素之誠其新孔嘉佇俟千金之諾  
道士王如晦真贊

色如春温若可與言神如水清不可以煩子喬仙去  
遠矣乃今識其裔孫任造化之日逝獨湛然而常存

二

道風仙骨照青春誰寫生綃却亂真莫訝三毛不加  
頰齊公端解視全人

道士李冲妙真贊

蟠根仙李萬葉敷遺芳豈直黃冠徒吐氣硤砢古丈  
夫味道之腴貌何癯誰令畏壘俎豆予龍吟虎嘯人  
爭趨故棲猿鶴情未踈翻然脫屣吾歸歟舍者爭席  
不關渠向來形謀誠區區

二

領袖名山龍吟虎嘯忽辭屨於戶外信光矣而不耀  
是將冲而用之深入乎衆妙之門吾不知其人曰伯  
陽之孫

自贊寫真

堂堂莫作公侯想是身如幻無定相衣冠掛却神武



門便是維摩坐方丈

二

投閑歲久聖恩圖舊載錫身章在帝左右骨相多屯

何以瘡人陳力就列勿為具臣門吾不昧其人曰外

賤幽台山請今

三

不關果向來

年鈔姑

夫和戲之

華陽集卷第三十三

畢



書